

ASO LUA, 23 IANUARI 2018

Na tauaofia le Fono Aoaofa Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2018.

Na nofoia le Nofoa e le Fofoga Fetalai i le itula e 9:10 i le taeao.

Tatalo.

SAUNOAGA FAAFEILOAI A LE FOGOGA FETALAI

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoaofa Faitulafono.

Ou te avea ia lenei avanoa ou te faatalofa atu ai ma le agaga faaaloalo, i le afio o lau Afioga i le Taitai o le Maota lau Afioga i le Palemia o le Tama foi lea o le atunuu, faapea foi le Sui Palemia ma lo oulua auvaa, le paia o le Kapeneta aemaise foi o sui usufono mamalu uma o lenei Palemene.

E faapea foi ona faatalofa atu i Faauluuluga o Matagaluega ma Faalapotopotoga a le Malo i lenei taeao, aemaise foi o le faafofoga tapuai mai a Samoa e amata mai i ona ao seia oo i ona iu, e faapea foi le paia maualuga i Taitai o Ekalesia e fia aemaise o Feoi o le Talalelei o lo o latou faanonomanu, e a se manuia o Samoa ma lana Faigamalo ma ona tagata.

Faafetai i le Atua o lea ua mafai ona tatou taunuu mai i le Fono amata o lenei foi tausaga, e i ai le talitonuga, ana le seanoa le Atua na ia i tatou, e tatou le maua Lona filemu ma Lona matagofie i lenei taeao.

Ia alo ia i outou faiva i lenei taeao aua le usua o le Fono mamalu o le Palemene, e saili manuia aua ai o le tapuaiga a Samoa.

Ia faamanuia foi le Atua i le tapuaiga a Samoa, aemaise foi o le au galulue i lenei aso, e ala i le Ofisa o le Fono ma lana Failautusi, aemaise foi le auunaga masani a Malu o le Malo i le Ofisa o Leoleo, aemaise o Faauluuluga o Faalapotopotoga ma Matagaluega a le Malo.

FAASILASILAGA MAI LE TAITAI O LE MAOTA

Na fofogaina e le Fofoga Fetalai le Faasilasilaga mai le Taitai o le Maota.

E tusa ai ma le Tulafono Tumau 76 a le Palemene, ua tuuina atu nei le Faaaliga i le Fono Aoaofa Faitulafono mo le iloiloaina o le Tulafono Tau Faaofi ua faaaliga i nei:

1. Tulafono Tau Faaofi o Teuteuga o le Tulafono o Auaunaga Faa-Soifua Maloaina a le Atunuu 2018.

23 IANUARI 2018

Faasilasilaga mai le Taitai o le Maota

TUUINA ATU i lenei aso 19 o Ianuari i le tausaga 2018.

(Sainia): **Susuga Hon Tuilaepa Auelua Fatialofa Lupesoliai Lolofietele
Neioti Aiono Galumalemana Dr. Sailele Malielegaoi.
TAITAI O LE MAOTA.**

FAASILASILAGA MAI LE TAITAI O LE MAOTA

Na fofogaina e le Fofoga Fetalai le Faasilasilaga mai le Taitai o le Maota.

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoaofa Faitulafono mo le iloiloina o Tulafono Tau Faaofi ua faaaliga i inei:

1. Tulafono Tau Faaofi o Teuteuga o le Faavae 2018.

TUUINA ATU i lenei aso 21 o Ianuari i le tausaga 2018.

(Sainia): **Susuga Hon Tuilaepa Auelua Fatialofa Lupesoliai Lolofietele
Neioti Aiono Galumalemana Dr. Sailele Malielegaoi
TAITAI O LE MAOTA.**

SAUNOAGA O MALIU

*Na faasilasila e le Fofoga Fetalai le tuumalo o le **Susuga Hon SEIULI Taulafo**, o Le sa avea ma Sui Usufono o le Palemene i Paeaiga ua mavae.*

*O le **Susuga Hon SEIULI Taulafo**, na uluai filifilia mai ma avea ma Sui Usufono o le Palemene mo le Itumalo Faaalaalafaga o Sagaga le Usoga i le Paeaiga Lona IV mai le tausaga 1970-1973 ma le Paeaiga Lona V mai le tausaga 1973-1976.*

Sa avea o ia ma Minisita o le Matagaluega o le Soifua Maloloina i le tausaga 1973-1976.

*Na tuumalo le **Susuga Hon SEIULI Taulafo** i le aso 20 Tesema 2017.*

*Ia avea ia o lou leo e fai ma sui o le Palemene, e momoli atu ai faamaisega ma faamafanafanaga i le nofo a alo ma aiga aemaise o le itumalo pele, ona o le toesea o le **Susuga Hon SEIULI Taulafo**.*

Na tutulai filemu le Maota mo le minute e tasi e faailoa ai lo latou faaaloalo i le sui usufono ua tuumalo.

23 IANUARI 2018

TUUINA ATU O PEPA

Na tolaulau e le Failautusi Pepa nei ua faataatia i luga o le Laulau a Fono e tusa ai ma le T.T.49.

1. P.P. 2017/2018 Nu.116, Lipoti Faaletausaga a le Ofisa Tausi Mavaega mo le Tausaga Faaletupe na faaiuina aso 30 Iuni 2016.
2. P.P. 2017/2018 Nu.117, Lipoti Faaletausaga a le Pulega o Tupe Faava o Malo a Samoa mo le Tausaga Faaletupe na faaiuina aso 30 Iuni 2017.
3. P.P. 2017/2018 Nu.118, Lipoti Faaletausaga a le Faletupe o Atiina Ae a Samoa mo le Tausaga Faaletupe na faaiuina aso 30 Iuni 2017.
4. P.P. 2017/2018 Nu.119, Lipoti Faaletausaga a le Penisione mo le Palemene 2017.
5. P.P. 2017/2018 Nu.120, Lipoti Faaletausaga a le Faaputugatupe mo le Lumanai Manuia o Tagata mo le Tausaga Faaletupe na faaiuina aso 30 Iuni 2017.
6. P.P. 2017/2018 Nu.121, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga Faaletupe na faaiuina aso 30 Iuni 2016.
7. P.P. 2017/2018 Nu.122, Lipoti Faaletausaga a le Pulega o Malae Vaalele a Samoa mo le Tausaga Faaletupe na faaiuina aso 30 Iuni 2017.
8. P.P. 2017/2018 Nu.123, Lipoti Faaletausaga a le Faaputugatupe o Faamanuiaga mo Tagatanuu Matutua o Samoa mo le Tausaga Faaletupe na faaiuina aso 30 Iuni 2017.
9. P.P. 2017/2018 Nu.124, Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe na faaiuina aso 30 Iuni 2017.
10. P.P. 2017/2018 Nu.144, Lipoti Faaletausaga a le Matagaluega o le Palemia ma le Kapeneta mo le Tausaga Faaletupe na faaiuina aso 30 Iuni 2017.

TUUINA ATU O LIPOTI A KOMITI FAA-PALEMENE

Na tolaulau e le Failautusi Lipoti a Komiti Faa-Palemene nei ua faataatia i luga o le Laulau a Fono e tusa ai ma le T.T.52(5).

1. P.P. 2017/2018 Nu.125, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P. 2016/2017 Nu.137, P.P. 2016/2017 Nu.138 ma le P.P. 2016/2017 Nu.153, Lipoti a le Suetusi Sili i le Fono Aoaofaitulafono i Luga o Galuega a le Ofisa Suetusi o Samoa mo Tausaga Faaletupe 2012/2013, 2013/2014 ma le 2014/2015.
2. P.P. 2017/2018 Nu.129, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P. 2017/2018 Nu.65 & P.P. 2017/2018 Nu.69, Lipoti Faaletausaga a le Ofisa o le Komesina o Faiga Palota mo Tausaga Faaletupe 2013/2014 & 2014/2015.

23 IANUARI 2018

Tuuina atu o Lipoti a Komiti Faa-Palemene

3. P.P. 2017/2018 Nu.131, Lipoti a le Komiti o Tupe Maua ma Tupe Totogi i le Tulafono Tau Faaofi o Teuteuga o le Tulafono o Galuega Tinei Mu ma Faalavelave Tutupu Faafuasei 2017.
4. P.P. 2017/2018 Nu.135, Lipoti a le Komiti o Tupe Maua ma Tupe Totogi i le P.P. 2017/2018 Nu.107, Tala Faatatau o Tupe Faapoopo (Nu.1) 2017/2018.
5. P.P. 2017/2018 Nu.136, Lipoti a le Komiti o le Vaega o Atinae Eseese i le S.R. 2017/7, Tulafono Faatonutonu o Tagata Tomai Faainisinia (Faamauina) 2017.
6. P.P. 2017/2018 Nu.137, Lipoti a le Komiti o le Vaega o Atinae Eseese i le P.P. 2017/2018 Nu.62, Lipoti Faaletausaga a le Pulega o Felauaiga i le Laueleele mo le Tausaga Faaletupe na faaiuina aso 30 Iuni 2016.
7. P.P. 2017/2018 Nu.138, Lipoti a le Komiti o le Vaega o Atinae Eseese i le P.P. 2017/2018 Nu.63, Lipoti Faaletausaga a le Matagaluega o Galuega, Felauaiga ma Atinae Eseese mo le Tausaga 2015-2016.
8. P.P. 2017/2018 Nu.141, Lipoti a le Komiti o le Vaega Tau le Tamaoaiga i le P.P. 2017/2018 Nu.108, Lipoti Faaletausaga a le Ofisa o Fuainumera Faamauina mo le Tausaga Faaletupe 2015/2016.
9. P.P. 2017/2018 Nu.142, Lipoti a le Komiti o le Vaega tau le Va Fealoai i le S.R. 2017/8, Tulafono o Tagata e Suesueina Mafuaaga Lilo o Maliu 2017 ó Faasilasilaga o le Amata Faamamaluina.
10. P.P. 2017/2018 Nu.143, Lipoti a le Komiti o le Vaega tau le Va Fealoai i le P.P. 2017/2018 Nu.66, Lipoti Faaletausaga a le Matagaluega o Tina ma Tamaitai, Atinae o Nuu ma Afioaga ma Agafesootai mo le Tausaga Faaletupe 2015-2016.
11. P.P. 2017/2018 Nu.145, Lipoti a le Komiti o le Vaega tau le Va Fealoai i le P.P. 2017/2018 Nu.106, Lipoti Faaletausaga a le Auaunaga o Falepuipei ma Toefuataina mo le Tausaga Faaletupe 2015/2016.
12. P.P. 2017/2018 Nu.146, Lipoti a le Komiti o le Vaega tua le Va Fealoai i le S.R. 2017/5, Tulafono Faatonutonu o Teuteuga o Tulafono Faatonutonu o Galuega Tau Leoleo 2017.

**LAFO MO LE FAAUI I TUA O LE TULAFONO TAU FAAOFI
(TT 65)**

Afioga Hon TIALAVEA FEA LENIU TIONISIO HUNT (Minisita mo Tupe Maua): Faafetai i lau Afioga i le Fofoga Fetalai mo le avanoa. E faatalofa atu foi i lau Afioga ma le Palemene nei e tusa ai foi ma le amataga o galuega o lenei tausaga, aemaise foi o le atunuu o lo o faafofoga mai.

Ae ou te tulai atu lau Afioga i le Fofoga Fetalai, ou te faatu le lafo, *Ina ia faaui mai i tua le Tulafono Tau Faaofi o Teuteuga o le Tulafono o Tupe Maua (Nu.2) 2017, e pei ona tuuina atu i le Komiti o le Vaega Tau Le Tamaoaiga i le aso 13 Novema 2017.*

Faalua e le Minisita mo le Soifua Maloloina ma le Minisita o Tupe.

Na faamaonia le lafo ma tulai ai le Tulafono Tau Faaofi o Teuteuga o le Tulafono o Tupe Maua (Nu.2) 2017 ua faaui i tua.

23 IANUARI 2018

LAFO A LE KOMISI FAA-PALEMENE

Tofa NAFOITOA TALAIMANU KETI (Sui Taitaifono o le Komisi Faa-Palemene): Lau Afioga i le Fofoga Fetalai, ua tulaga ese foi lenei taeao i le maitau ma le vaavaai. Ona i ai lea o le manatu ina neʻi ou momoo i ia o le loloto ae galo ai figota o le aloalo. Ona ou manatua ai lea o le tala i ni Tamaitai se toalua o le Talalelei. Fai mai, ʻina ua alofagia Maria e le Atua, ona alu lea e faafeiloai ma tau ia Elisapeta, o Tina tautaua na faaaogaina e le Atua, e faataunuu ai valoaga a le Au Perofeta i le Mesia valoia. ʻFai mai le faamatalaga, ʻina ua vaai atu Elisapeta ia Maria, ona osooso lea o le Tama i totonu o lona manava, fai mai ua fiafia. Aisea? Ua vaai i lona Faaola ma lona Alii. ʻA o upu o na feiloaiga ina ua ofofofo Tamaitai o le Talalelei, ʻe talofa e, si ou alofa. ʻ

Lau Afioga i le Fofoga Fetalai, o lagona na ma laei na o lenei taeao i le maitau atu i le la itu o le Maota ma lenei foi itu, e le alu loa ai mo le Lafo a le Komisi Faa-Palemene ae ao ona matou faafeiloai ma faatalofa i le paia ma le maualuga o le Maota.

Si ou alofa i lenei taeao i lau Afioga i le Fofoga Fetalai, malo folau, malo toa, malo le soifua maua, manuia le tausaga fou o lea ua tatou feiloai i feau ma galuega a le Maota, ia i ai le agalelei o le Atua i lau Afioga ma le Nofoa.

Ou te faafeiloai atu foi ma faatalofa, si ou alofa lau Afioga i le Taitai o le Maota, lau Afioga i le Palemia, le Sui Palemia ma le mamalu o le Aiga Kapeneta, e faapea foi Afioga i Sui Minisita, malo faatoatoa i lena tausaga, le uluai Fonotaga lenei a le tatou Palemene o lenei tausaga 2018, malo tau.

Ou te faatalofa foi i lea itu o le Maota, le afifio a outou Afioga i Taitaifono, Komiti Faa-Palemene, aemaise o sui usufono mamalu o le Palemene. E faapea foi i Faauluuluga o Matagaluega ua mafai ona tatou auai i lenei taeao. Ia malo le soifua, malo le tau, malo le tauatai, malo le galulue. Manuia le tausaga fou, manuia galuega o lenei tausaga 2018.

Ou te faatalofa foi i le tapuaiga a le atunuu e mai mauga tetele seia oo lava i maugaiti, Aiga ma o latou Tama, o Tama ma Aiga, le Usoga a Pule ma Tumua, Ituau ma Alataua, Aiga i le Tai ma le Vaa o Fonoti, Aiga o Nofo, Aiga o Papa ma Aiga na Tafaifa. Malo le tapuai, manuia faiva o le Palemene i la outou tapuaiga, ia po po laia o le fala se i alo lau Palemene i lenei tausaga aua so tatou ai mo le agai i luma.

Lau Afioga i le Fofoga Fetalai, ou te tulai atu, ma le faaaloalo e faatu le lafo, *Ina ia faamaonia e lenei Fono Aoao le Polokalame Lona Tolu o Fonotaga mo le Tauaofiaga a le Palemene 2018/2019, ua tuuina atu iinei e pei ona faatulagaina e le Komisi Faa-Palemene, e tusa ai ma aiaiga o Tulafono Tumau 170(g).*

<i>Masina</i>		<i>Aso</i>
<i>Ianuari</i>	-	23
<i>Mati</i>	-	20
<i>Me</i>	-	29
<i>Iuni</i>	-	19
<i>Oketopa</i>	-	2
<i>Tesema</i>	-	18
<i>Ianuari 2019</i>	-	22

23 IANUARI 2018

Lafu a Taitaifono o Komiti Faa-Palemene

Ma le faaloalo.

Faalua e le sui usufono mo Siumu ma le sui usufono mo Palauli le Falefa.

Na faamaonia le lafo ma faamaonia ai le Polokalame o Fonotaga a le Palemene 2018/2019.

LAFO A TAITAIFONO O KOMITI FAA-PALEMENE

Afioga Hon AEAU PENIAMINA LEAVAISEETA (Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae): Lau Afioga i le Fofoga Fetalai, ae le i faataunuuna lou tiute i lenei uluai taeao, e muai ona ou faatalofa atu i le pau o le Maota nei, lau Afioga i le Fofoga Fetalai, lau Afioga i le Palemia ma le mamalu o le Palemene o Samoa, ae tainane foi le faafofogaaga leaga e faigata o taeao taua ua faafofoga le atunuu, Taulumaga o le Fono Aoao Faitulafono. E talitonu le agaga o lo o faafofoga mai o tatou itumalo uma o Samoa lena. Ua lagona i se a? I le alofa le mavae o le tatou Matai i le lagi, e tataua pea ona onomea ona lagona so matou leo i lenei uluai taeao ma le tatou alo atu i le tatou galuega, e le gata nei ia aemaise Taulumaga i le faatasi mai o le tatou Matai. O le agaga faafetai lea o lenei sui usufono i le tatou uluai taeao lenei.

Ae ua ou tulai atu lau Afioga i le Fofoga Fetalai, e faatu le lafo, *Ina ia tuuina mai e le Fono Aoao se Faatagaga e faaopoopo ai le taimi e iloiloina ai Galuega e 3 ua taua i lalo, na tuuina mai i lenei Komiti, ona e le i maea atoatoa ana iloiloiga, ma lipoti mai ai i le Fono Aoao i le Fonotaga e sosoo ai.*

1. Tulafono Tau Faaofi o Teuteuga o le Tulafono o Tulaga Mamalu ma Faailoga Taualoa 2017.
2. P.P.2017/2018 Nu.59, Lipoti o le Tulaga o Aia Tataua a Tagata Soifua 2017 a le Ofisa o le Komesina o Sulufaiaga.
3. P.P.2017/2018 Nu.100, Lipoti Komisi o le Toefuataiga o Tulafono a Samoa i le Pule a le Matai Saø (Lipoti Faaiu 18/17), Fepuari 2017.

Faalua e le Sui Fofoga Fetalai, le sui usufono mo Palauli le Falefa ma le sui usufono mo Safata Sisifo.

Na faamaonia le lafo.

Afioga ALIIMALEMANU ALOFA TUUAU (Taitaifono o le Komiti o Tupe Maua ma Tupe Totogi): E faatalofa atu i lau Afioga i le Fofoga Fetalai, ia faapea le mamalu o lenei Palemene, aemaise le faafofoga tapuai mai a Samoa.

23 IANUARI 2018

Lafo a Taitaifono o Komiti Faa-Palemene

Ua ou tulai atu lau Afioga i le Fofoga Fetalai, ou te faatu le lafo, *Ina ia tuuina mai e le Fono Aoao se Faatagaga e faaopoopo ai le taimi e iloiloina ai Galuega e 2 na tuuina mai i lenei Komiti, ona e le i maea atoatoa i ai ana iloiloga, ma lipoti mai ai i le Fono Aoao i le Fonotaga e sosoo ai.*

1. P.P. 2017/2018 Nu.58, Lipoti Faaletausaga a le Iunivesite Aoao o Samoa, 1 Iulai 2015-30 Iuni 2016.
2. P.P. 2017/2018 Nu.64, Lipoti Faaletausaga a le Ofisa o le Pule Faatonu mo le Tausaga Faaletupe na faaiuina aso 30 Iuni 2016.

Faalua e le sui usufono mo Palauli le Falefa ma le sui usufono mo Siumu.

Na faamaonia le lafo.

Afioga TAFUA MALUELUE TAFUA (Taitaifono o le Komiti o le Vaega o Atinae Eseese): E faatalofa atu foi i lau Afioga i le Fofoga Fetalai, na ou maua i le taeao nei le saunoaga mamalu a le Sui Fofoga Fetalai, faapea mai le Agelu ia Maria le tina o Iesu, si ou alofa, ona ona faapuupuua atu lava e leai o le upu a le Agelu na fai i le tina o Iesu, si ou alofa Maria ua tumu oe i le kalasia.ø

O lenei taeao lau Afioga i le Fofoga Fetalai, ia ou te faapea atu, si ou alofa lau Afioga i le Fofoga Fetalai, e vaai atu ua tuai lau savali mai ua tumu oe i gasegase o le tino, ae tatalo i le Alii, e faafoisia lou malosi. E faatalofa atu foi i le Afioga i le Palemia ma le Kapeneta, ma lena itu o le Maota aemaise foi lenei itu. Ae le i faatu atu le lafo lau Afioga, avefa foi lenei avanoa e molimoli atu ai faamaisega ma faamafanafanaga i se tasi o sui usufono, ona o le toesea o le tuua tina i le vaiaso ua tuana'i, le Afioga lea ia Faaulusau, ia se i maea le Fono tatou talanoa, leaga o oe le tamaitai o le purinise o le tatou Komiti.

Lau Afioga i le Fofoga Fetalai, ou te tulai atu ma le faaaloalo, ou te faatu le lafo, *Ina ia tuuina mai e le Fono Aoao se Faatagaga e faaopoopo ai le taimi e iloiloina ai Galuega e 2 ua taua i lalo, na tuuina mai i lenei Komiti, ona e le i maea atoatoa i ai ana iloiloga, ma lipoti mai ai i le Fono Aoao i le Fonotaga e sosoo ai.*

1. P.P. 2017/2018 Nu.68, Lipoti Faaletausaga a le Pulega o Uafu ma Taulaga mo le Tausaga Faaletupe 2015/2016.
2. P.P. 2017/2018 Nu.70, Lipoti Faaletausaga a le Matagaluega o Fesootaiga ma Faamatalaga Tekonolosi mo Tausaga 2011-2016.

Faalua e le sui usufono mo Siumu, le sui usufono mo le Itumalo Tu Taulaga Sisifo, ma le sui usufono mo Faasaleleaga Nu. 1 Sisifo.

Na faamaonia le lafo.

23 IANUARI 2018

**TULAFONO TAU FAAOFI O TEUTEUGA O LE TULAFONO O
AUAUNAGA FAA-SOIFUA MALOLOINA A LE ATUNUU 2018**

– faitauga muamua

Afioga Hon TUITAMA TALALELEI TUITAMA (Minisita mo le Soifua Maloloina): Lau Afioga i le Fofoga Fetalai, ia o lea ua tu mai lagi le lagaali a Tamafaiga i le taulaga molia o lenei taeao. E lagona foi le agaga fiafia e faaoga ai le avanoa e molimoli atu ai faamanuiaga o le tausaga fou i lau Afioga, ma le mamalu o sui usufono uma o lenei Palemene, faafetai i le agalelei o le Atua, ua molimoli ma le manuia mai lo outou soifua ma lo matou ola ua toe amatalia le tatou galuega i lenei tausaga fou.

E faapea foi ona ofo alofa atu i le mamalu o faafofoga mai o lou itumalo, le paia i Aiga Satuala, Aiga o Mavaega, Aiga Taulagi, mamalu i Tama-a-aitu lau Gafa, Alo o Tamaalelagi, ia faapea foi le paia maualuga i Tootooau o le Faletolu ma Fuafale. Ae avea foi lenei avanoa ou te faaoo atu ai ia faamafanafanaga ma faamaise atu i le tina ma le nofoaalo, le aiga o le uso a fomai le Afioga Masoe Dr. Toga Potoi i le tuua o le malo, ia faamaise le Atua ma faamafanafana atu i le aiga faavauvau.

Ae ua ou tulai atu lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Auaunaga Faa-Soifua Maloloina a le Atunuu 2018 i lona faitauga muamua.*

Faalua e le Minisita mo Galuega, Felauaiga ma Atinae Eseese, Minisita mo Faatoaga ma Faigafaiva ma le Minisita mo Leipa, Pisinisi ma Alamanuia.

Na faamaonia le lafo ma faitauina le Tulafono Tau Faaofi i lona faitauga muamua.

Susuga Hon TUILAIPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te tulai atu ma le agaga faaaloalo, e faatu le lafo, *Ina ia faitauina nei le Tulafono Tau Faaofi o Teuteuga o le Faavae 2018 i lona faitauga muamua.*

Faalua e le Minisita mo le Soifua Maloloina, le Minisita mo Leipa, Pisinisi ma Alamanuia ma le Minisita mo Tupe Maua.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O LE FAATATAUINA O TUPE
FAAOPOPO (NU.1) 2017/2018 – felafolafoaiga i luga o le faitauga
faalua**

FOFOGA FETALAI: E tusa ai ma Tulafono Tumau, o le a faagasolo nei felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.1) 2017/2018.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

O le avanoa leni mo sui usufono e saunoa ai i le Tulaga Tau Tupe ma le Tamaoaiga o Samoa faapea Faiga Faavae Tau Tupe a le Malo.

Ou te toe faamanatu atu i sui usufono mamalu, e le mafai ona tautalagia i leni avanoa mo saunoaga ia Mea Taitasi o le Tulafono Tau Faaofi. O le a faapitoa lava saunoaga i Mea Taitasi i le taimi o le Iloiloga Auiliili o le Tulafono Tau Faaofi o le Faatatauina o Tupe Faaopopo (Nu.1) 2017/2018.

O le avanoa leni mo se sui usufono e fia saunoa. Tulai mai le sui usufono mamalu mo Gagaifomauga Nu.3.

Susuga Hon LAAULI LEUATEA POLATAIVAO FOSSIE SCHMIDT (Gagaifomauga Nu.3): Ma le agaga faaaloalo tele ona o tulaga faaletonu o tatou meafaigaluega, ia pe mafai ona ou faaaogaina ai meafaigaluega a le isi sui usufono, ona o lo o faaletonu le mea faaleotele leo o le nofoa o leni itumalo? O le talosaga lea ma le agaga faaaloalo, ina ne i ou solia vasaga, pe ou te faoa le mamalu o le nofoa o le isi itumalo, ia ona o lo o fia fai le saunoaga a leni itumalo ae o lo o faaletonu a tatou meafaigaluega.

FOFOGA FETALAI: Ia ua maua atu le finagalo o lau Afioga i le sui usufono mamalu. Leai e tatou te galulue soosootauau i le faatinoga o le tatou galuega, afai o lou finagalo lea. Ae faamalulu atu foi, e i ai lava tapenaga e faapena lava ona lelei faatino, ae pei lava ona outou silafia le fesuisui ai o le tau i leni vaitaimi, ia o le mafuaaga lea e faaletonu ai a tatou meafaigaluega. Ina ne i avea lea ma mea e tuuaia ai le Ofisa o le Fono Aoa, ia a o lena le faamoemoe. E momoli atu ai le faamaluluga i lau Afioga i le sui usufono mamalu, ia saunoa ia o lena ua faaavanoa le avanoa o le sui usufono mo Lefaga ma Faleaseela e te saunoa ma e malele ai e tusa ai o lau saunoaga.

Susuga Hon LAAULI LEUATEA POLATAIVAO FOSSIE SCHMIDT: Ou te faatulou atu i le paia ma le maualuga o le taeao fou, taeao manino ma le taeao totoa nai Tiafau o le Malae o le Faautugatagi a Samoa. O le Malae e saili ai Malo, o le Malae e fofola ai le fala ma sii le matalalaga, aua se manuia o Samoa nei ma a taeao. E manatu foi o lea ua maea ona velo le uluai asomua a Lemalama, ma faalele Lupe o le Talalelei ma le lau olive o le faaolataga aua le Atua, o Le Ou le pule, o Le Ou le mana, o Le Ou le malos, ua tatou aafu ai ma tatou ula i faamanuiaga mai lava i le aso na tatou ifo ai i le lalolagi leni, e oo mai i leni taeao.

Samoa o oe o le tapiga o le faletele, e toa i ai le pulu i le vasa, o le Maota Fono i Tiafau o le poututoa e faalagolago i ai poulalo, aua Samoa ma ona upufai o Malo. E leai se poto e leai se vave, e na te toe suia ai ni matalalaga, aua ua uma ona paepaeulufanua Samoa mai ona Ao seia oo i ona Iu. E leai la se fuaaleale e na te toe fuaalealeina le atunuu. Aua ua uma ona tofi tofa. Tofi le faale-Aganuu, tofi faale-Talalelei, tofi faale-Malo.

Ou te ofo alofa atu ma ou faatalofa atu i lau Afioga i le Fofoga o le Fono, lau Afioga i le Fofoga Fetalai o le Maota Fono o le Malo Tuatoatasi o Samoa.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

E faatalofa atu i lau Afioga i le Taitai o le Malo ma lau Kapeneta, aemaise sui usufono mamalu uma o le Fonousu a Samoa i lenei taeao. E leai se isi fonu i luma atu po o tua mai, leaga o le Fonu sili lenei a le atunuu, na fili tagata i ai sama se mago, fili se tautai, tautai se potu, tusitusiaa i ai Samoa ma lona Malo, tatou te omai iinei, e tautua Samoa, ina ia manuia ma atinae lona atunuu.

E faatalofa atu i lau Afioga i Le Ao Mamalu O Le Malo, i lau tapuaiga lau Afioga i le Tui Aana ma lau Masiofo. E faatalofa atu i Sui Usufono o le Sui o le Fonu a Sui Tofia, aemaise i la outou saofaiga o le Fonu Faatonu a Samoa. Lau Afioga i le Faamasino Sili, lau Afioga i le Peresetene i Alii ma Tamaitai o le Faamasinoga, o le Tafatolu lena o le Pulega a Malo a Samoa ua uma ona tofi, aua e leai se isi e mafai ona toe faia i ai se isi fuafuaga, ua tamau e oo i le faavavau.

Samoa ou te ofo alofa atu i lenei taeao, ona o lea ua tuta i Taga le vaa sa taumuaava aua lena tausaga ua tuanai atu, a o lea ua tofuola ola le vai nai le fale Tuamasaga, ae tofu magalo le ava na i le Salemuliga. Malo le soifua, malo le tatalo, malo le tauatai, malo le tapuai. Le paia i Aiga, Aiga ma a latou Tama, o Tama ma o latou Aiga, le Usoga a Tumua ma Pule, Itua ma Alataua, Aiga i le Tai ma le Vaa o Fonoti. O paia popo na o Samoa, o mamalu ma paia sauoo e mamalu ai Samoa i ona tulaga faalupe.

Ou te faapai atu foi i le tapuaiga o le Motu i Sasae, le paia maua i luga ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Faleagafulu ma lena itu o le Motu. O taua lava o le uso e tasi le tama, tasi le tina, uso taua. Malo le tapuai, faafetai tatalo i lenei itu o le vai.

Ou te faapai atu foi i le Afaigalugea Paia a le Atua i so o se fatafaitaulaga, o lo o outou ula le mulila ma tatalo aua se manuia o Samoa o nei ma a taeao. Malo le ositaulaga, faafetai le tapuai, faamalo le tatalo.

Lou itumalo e pele i le agaga, o Aiga e lua tetele o Samoa, o Sa Tupua ma Sa Malietoa, ma lou faletolu e tausia tupu ia. Tainane le tofa i le Tuua i Aiga ma Saeseese ma le Aiga o Mavaega. Faamanuia atu le Kerisimasi ma le Tausaga Fou, faamalo tatalo, faamalo le onosai.

O le matua o lau lauga i le tatou Tala o le Tupe lau Afioga i le Fofoga Fetalai i lenei tausaga, aua e te fefe, o au o le Alii lou Atua, o L muamua ma L mulimuli, ma ou te i ai pea ia te oe e oo i le faavavau, a ia e faatuatua mai ma e matau ia te au, o lou Atua e toatasi, Jesus, I trust in you.ø

Lau Afioga i le Fofoga Fetalai, ou te muamua ona momoli atu le agaga faafetai i lenei taeao, ona o le toe faavagavaga o lenei itu o le Maota ou te see mai i ai ona o le mataupu e pei ona lauiloa ma lausilafia e lo tatou atunuu. E le toe sau faamatalaga lau Afioga i mataupu ua i luma o le Faamasinoga, ae ou te faafetai tele i lau pule ua toe maua se laolao o lenei itumalo e faaauau ai pea la matou tautua e faaleo so matou sao ia Manuvao, e ala i le tautuaina o Samoa ma lou valaauina.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

O le lima lenei o masina lau Afioga i le Fofoga Fetalai talu ona ou tuua le la itu o le Maota ae ou sau iinei, ona o le faaiuga na ou faia i lou loto ma le talitonu, o le mea e tatau ona fai. E tatalo i le Atua ina ia sau taeao malama, ona sili lea ona tautino le amiotonu.

E faamalulu atu foi i lo tatou le auai i nisi o fonu i futia ua sola ma aso ua alu, sa tuu i le Atua mea uma ma ou nofo i lou afeafe ma ou tatalo. Sa ou moe i le lefulefu ma ou afu i le ietalatala, ma momoli talosaga i le Atua, ia alofagia le faamoemoe. E le o toe po malae i lau Afioga i le Fofoga Fetalai, o lena ua tuu atu le Faamasinoga e fai lana amiotonu, a o au na o lou tatalo i le Atua e faaali mai le isi laasaga nei ma le lumanai. E momoli atu ai vaimalu i puega i lau Afioga i le Fofoga Fetalai po o le a sau maitau, o le a sau silasila leaga e le o se manua mai fafo, o le manua mai fale, ua tauleagaina ai le igoa o sui usufono o le Palemene o Samoa. Ae na ona ou faaoloolomaau malie lou finagalo pe afai ua sala, sala ia, ae ia sala ia Vala. Ae ou te talitonu ma ou faatuatua i le Atua, e sau taeao malama, ona manino lea o le mata o le vai.

E faafetai atu i le tapuaiga a le Maota Fonu ma la outou tatalo, faafetai ia te outou o lo o outou tatalo mo le faamoemoe. Ou aiga ma au uo ma e masani, e faamalulu atu, e pei lava o au upu ma au tala, ou te le faia se mea e tasi e tauleagaina ai le igoa o lo tatou vanonofo ma mea uma.

Lou itumalo, e pei lava o le tatou feiloaiga, o la outou pule ma la outou faaaloalo, e leai se isi e na te valetuulima. Ae lafo mai pea la outou faatuatua, saili le amiotonu, ona silafia lea o mea uma. Pau lava lea lau Afioga i le Fofoga Fetalai, o le mea e tupu ia te au nei, e ono tupu i se isi o le Palemene taeao. E faanoanoa lava le loto, ona e i ai nisi o tulaga ua faaali e le Atua ia te au i ou mata faaleagaga, talofa, sogi ae le moni, na ona tino ia Esau ae leo eseese ia Iakopo. O fautuaga foi lea na ou tuuina atu i sui usufono, taatia le mataupu, aua le aafia fua ma palupalu faiga faalililo e faaoo ai manua ma leaga i nisi tagata. E ui o lea, o le onosai, o le meaalofa lena a le Atua na tuuina mai. Onosai ma tauave pea, o le koluse o le faalumaina, e fanau ai measina i le lumanai.

Lau Afioga i le Fofoga Fetalai, o Samoa o le atunuu ua uma ona matamaga lona tamaoaiga, ma e leai se isi mea fou i lo tatou olaga, ua uma ona tuu uma e le Atua fuafuaga mo lo tatou siosiomaga ma lo tatou galue, ma lo tatou valaauina aua tofiga o tatou e lo tatou Malo. O le tauavega o le atunuu, e le mafai e lo tatou Malo ona tauave e na o le Malo, e manaomia le lagolago a le atunuu atoa, e pei ona i ai le vaenofaotolu o Pulega Malo, le Malo, Faamasinoga ma le Palemene, e faapena foi tulaga Malo i le atunuu, o le Malo, le Ekalesia ma le pule mamalu a alii ma faipule. A tatou manatunatu mai le uluai taimi na tatou Tutoatasi ai e oo mai i le aso, e maeu le alofa o le Atua. E tele ma anoanoai mea lelei ua tatou vaia, tele ma anoanoai le alofa o le Atua mo Samoa, tamaoaiga, mea eseese e tatou ta sapi ai i le olaga lenei, e tele ma anoanoai lona alofa foai fua e ala mai i isi atunuu mai fafo. O le mea aupito i sili lena lau Afioga i le Fofoga Fetalai, ana leai le alofa lena, semeamanu e tatou te le taunuu mai i le manuia o lenei taeao.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

O lau tuualalo lau Afioga i le Fofoga Fetalai, ua mavae taimi o fefulituaaiga, ua mavae taimi o faigata ma puapuaga, a o lea ua faataumuaava le sa o Samoa o le a tatou taunuu e sapi ma tatou tali faamanuiaga. Peitai e le moe le fili, o lo o agai mai pea i taimi uma e lepeti le faamoemoe o faamoemoega lelei uma, o lo o tatou taumafai i ai mai lea aso i lea aso. O le Tafatolu o le Pulega Malo lau Afioga i le Fofoga Fetalai, e matua manaomia le tutu faatasi aua le atinaeina o mea uma e fetaliai le finagalo o le Malo, le finagalo o Ekalesia, ma le finagalo o le atunuu lautele. O le a le mea e finagalo i ai le Malo a le lagolago Ekalesia ma le pule mamalu a alii ma faipule, e leai se mea e tupu. E pei o le vaa o lo o see i aupeau o le vasa, a le silafia e le kapeteni mafaugauga a lana aualo, o le a le mea e tupu? E toa, a le logoa e le aualo le kapeteni ni faaletonu o le sa, o le a le mea e tupu? Tatou te gotouga, ma tatou fano uma ai.

O le mea lena e faatau ia te au le Tala Faaopoopo lena o le Tupe, e tatau ona matua tutu faatasi Samoa atoa e lagolago le faamoemoe. Ua lava tai sa tatou i ai i femateaga, ma tulaga eseese, sa tatou femateai ai. A ia maua le vafealoaloai ma le vatapuia i lea pulega ma lea pulega e faafae ai le tatou Malo.

Ou te momoli atu le agaga faafetai tele i le tatou Malo mo le amataina o le tatou Kamupani Vaalele. O se miti lelei ua leva ona tatau ona tatou onosai e toe fai, ona pau lea o le auala, o le alalaupapa lena e mafai ai ona fesootai i le lau mai ma le lau atu, e le gata i le atinaeina o le atunuu a o fua o faaeleelega auina atu i fafo. Peitai, e tele le galuega e tatau ona tilotilo i ai. I le maitau i le taimi lena, talu ona faatulai mai ia le tatou Kamupani Vaalele, ua ese foi tu ma aga a isi Kamupani Vaalele ua leva na i i nei. Ua matua omai i lalo pasese i le matautia e gata ai. Ua latou omai foi i lalo e fai le faatauvaga ina ia maua le manuia mo tagata feoai. Ae sa leai lava nei mea i ia aso sa o tatou pologa ai i le tai \$2,000 \$3,000 one way sa tatou malaga ai. A o le faatulai mai o le tatou Kamupani Vaalele, ua tatou vaai ai i le mea sa tatau ona i ai le faatulagana o pasese i futia ua sola ma aso ua alu. O lea e faafetai ai i le taumafaiga a le tatou Malo i lea tulaga a ia tatou faia ia le sootaga vavalalata pei ona ou fautua atu muamua, e manaomia le lagolago a le atunuu.

Lau Afioga i le Minisita ia e onosai, leaga o le o mai lea ua omai ai le Air Niu Sila, e o mai e toe tape ia le tatou kamupani, o le upu sao lena. Ae ia e onosai e te tatalo i le atunuu ma tatou taufai galulue faatasi, ina ia faaosofia moegaluga ia Samoa e felelei i le tatou vaalele. E leai lava se isi mea, e leai a se isi mea tatou te aputi ai le kamupani lea ia ola, o tatou tagata lava, e omai e felelei. E ui ina tatou vaai i le fesuiaiga o pasese ma mea uma i le taimi lena, ae a tatou toto i loto o tagata Samoa le loto atunuu ma le agaga o le lagolago, ou te manatu e manuia le faamoemoe.

Sa ou faaitaia le tulaga lena ina a o ave au ma Minisita mo Faatoaga, i le taimi na taumafai ai ia le tatou talo e ave i fafo. Na pau lava lea o le mea na fai, o le tatalo ia Samoa e omai e taumafa mea ia ma faatau mea ia. O lou sao e toe foi i le atunuu. E tiga le aulelei o talo Fiti ma talo Toga ma isi atunuu e le i atoa se 3 itula na faatau ai containers ae uma, ona o le a?

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

O le loto atunuu lena e tatau ona toso mai, ina ia matua galulue faatasi, ekalesia, le atunuu mai lava i e matutua seia oo i e iti, e manaomia le tutu faatasi ina ia manuia le faamoemoe mo le tatou Kamupani Vaalele.

Ua ou maitau lau Afioga i le Fofoga Fetalai e le mafai ona tuua ni upu e tatau ona avatu. Ua ou tautuu mai foi i lenei itu o le Maota, ua ou lagona ai le agaga faafetai, e sefulutolu nei o tausaga talu ona avea au ma sui usufono, e sefulu tausaga o galue i lalo o le Ofisa o le Fono, e lua tausaga o galue Faaminisita. Na ou vaai ai lau Afioga i le Fofoga Fetalai i le tele ma le taua, o le fusi o le fau o Malo e pei ona ou taumafai e faapulapula atu o le galulue faatasi, "united we stand, divided we fall." E sefulu tausaga sa ou i ai i le Ofisa o le Fono lau Afioga i le Fofoga Fetalai, e maeu le alofa o le Atua. Ia o lea e molimau uma i le faatonutonufolauina e ala i a tatou Tulafono mo le lelei ma le alualu i luma o le tatou Palemene, faafetai i le Alii.

I lou lua tausaga Faaminisita, na ou iloa ai le tele o le galuega e tatau ona fai, ae ma o lea o le a ou faaleoa atua semanu o maua lou avanoa, ma ou te tuuina atu ai fautuaga i a outou Afioga i Minisita. E le faigofie, ae tatau ona amata nei ona tilotilo ma maioio lelei le faatonutonufolauina o a tatou Matagaluega uma a le Malo. Faafetai i Faauluuluga o Matagaluega ma aufaigaluega a le Malo i e o lo o galulue punouai ma fai le galuega lelei aua le manuia o le atunuu. A o totonu foi i i, o lo o i ai le aufaatamala, o lo o i ai latou e mafaufau pea o mea a le Malo, o mea faitele, a gau a gau, a leaga a leaga, e le popole. A o le gaoioi a le tagata o lana meatotino, a e gau, e tau i ou ivi, e te lagona le tiga, e te lagona foi le mafatia.

O le lagona lena, aua a maitau ma tilotilo, ua soo Samoa i le tulaga o faigamalo i fafo, ua tatou o i le tulaga e tatou te i luga ai o faalagamaea o le faafoefoaina o tupe ma mea uma, peitai, e le mafai lava ona aveesea le mea lea, o lo o tatou faalagolago pea i tupe nono e fund ai le tatou Budget. O lona uiga e tatau ona tatou toe tilotilo lelei ma tatou mataitu lelei i le faafoega o Matagaluega taitasi o le Malo. I lau mau i le lua tausaga i Matagaluega sa i ai, e i ai mea lelei e i ai mea e matua faaletonu lava, ona o le tulaga o le faatamala o nisi o le aufaigaluega. Ae mo le tatou faatonutonufolau mo le lumanai, e tatau ai ona tatou matua tutu malosi, tatou te aputiputi ma ave le fautuaga ma faamalamalama i Faauluuluga o Matagaluega ma Matagaluega a le Malo ma aufaigaluega a le Malo, ina ia o tatou alofagia le laasaga mo le lumanai. E le mafai, le mafai ona tatou o ai pea i le mea lea i le deficit every year, we have to change this....

FOFOGA FETALAI: Toe lima minute o le sui usufono.

Susuga Hon LAAULI LEUATEA POLATAIVAO FOSSIE SCHMIDT: E le mafai, ae na ona fautua atu, o lo o tele le avanoa e mafai ai ona suia le mea lea, e avea ma mea lelei, pe afai tatou te galulue faatasi i le aputiputiina o mea a le Malo.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

O le tulaga i le Pule ma Suetusi Sili, faafetai i le galuega lea, aua o i o lo o i ai le malosiaga a le Malo e toe fesiligia ai pe latou te agai e toe sailiili po o faaaoga sao tupe a le tatou Malo, ma e tatau foi ona faamalosia le itu lea ina ia mautinoa, o lo o faasoa ma le tatau mea a le tatou atunuu.

Lau Afioga ua ou maitau ua i ai le isi mea lea ua aumai i le tatou Tala o le Tupe, o le variation lea o le falepuipui. E tautala ma le faaaloalo lau Afioga i le Fofoga Fetalai, faapea lava au ua le toe faia mea ia. O fea la le ata ma le mea na faatino uma ai le mea muamua lea, na ala ai na pasia aloaia ma fai konekarate ma fai? O lona uiga ea ua faaleaoga uma na mea? Ae toe aumai o lona uiga o se isi falepuipui fou atoa ma le atoatoa ua fai?

FOFOGA FETALAI: Ia malie le sui usufono mamalu o lo o saunoa, se i saunoa mai le Minisita mo Falepuipui ma Auaunaga Toefuataina.

Afioga Hon Tialavea Fea Leniu Tionisio Hunt: Lau Afioga i le Fofoga Fetalai, ou te le i manao e faalavelave i le saunoaga matagofie a le sui usufono, o le foi sa matou iinei, atonu e eseese ia vaaiga i le tupe lea. O lona foi e i ai le Komiti o Tupe e tusa ma le \$3.7miliona lea na aumai nei, o le faalavaga lona o le tau o le konekarate. Na aumai e le konekarate lea e fauina le galuega e \$7.4miliona, ona aumai lea i le Tala Autu o le Tupe talu ai le tau \$3.7miliona, a o le \$3.7miliona lea ua aumai nei, e faauma ai le konekarate lea e \$7.4miliona. E leai se variation o le galuega lona e oo mai i le taimi lenei, te i ua misi i le faitau a le sui usufono, faafetai.

FOFOGA FETALAI: Ia malie le sui usufono, se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o konekarate faapenei e aofia ai ma le konekarate lea i le toe faaleleia o le falepuipui i lona nofoaga fou, e tauofo uma lava ia tatou konekarate. O le taua o le Tauofoga, ina ia aua ne i i ai ni faiga faaalatua ma ni faiga faaalualua e mafai ona sao ai i totonu i i. Ia ma e i ai ia le tatou Komiti e latou te soalaupuleina ia mea nei o Tauofoga o galuega tetele a lo tatou Malo, e i ai le Minisita o Tupe ma le Minisita mo Galuega.

Ae o le faatinoina foi o konekarate nei, e uma loa ona talai e i ai uma lava latou uma e Tauofo. O lona uiga e iloa uma lava e latou ia peti a lea konekarate ma le peti a lea konekarate, ia ona faatoa ave loa lea i le Komiti o latou ia o Ofisa Sili o Matagaluega latou te suesuea po o tali uma ia latou konekarate nei e tusa o aiaiga. Ma o le taimi e atagia ai, e i ai se vaega e le o mafai ona faamalieina, o i ina e cancel atoa ai le konekarate. E ala ona fai mea ia lau Afioga i le Fofoga Fetalai, ina ia aua ne i i ai ni tulaga e ono tulai mai ai ni mea sese e fai i tua.

Lau Afioga i le Fofoga Fetalai, o le ala lona e taua ai foi le faatupu manatu o le sui usufono o lo o saunoa nei, e malamalama lelei foi i taualumaga o le Kapeneta ma sa saofai ai foi i totonu o le Kapeneta.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

O le taua la o lona lagaina o mataupu ia, ua avanoa ai ma le faamalamalama a le tatou Malo i tulaga o galuega tetele a le Malo ma le mafuaaga e ala ai ona tauofo uma lava konekarate.

FOFOGA FETALAI: Ia o lona ua manino le saunoaga, faamanatu foi i le sui usufono mamalu o lo o saunoa, o fesili faapea o lea tatou e pei ona ou fautua atu i a tatou pe a iloilo auiliili ia le tulaga o a tatou Tulafono ia ona avanoa lava lea e fesili i Mea Taitasi, e fesoasoani atu i lau Afioga.

Tulai mai e saunoa.

Susuga Hon LAAULI LEUATEA POLATAIVAO FOSSIE SCHMIDT: Faafetai i lau Afioga i le Fofoga Fetalai, a manino lava ia le mata o le vai, ua toa le tai ona o lea e faafofoga Samoa.

Lau Afioga i le Fofoga Fetalai, sina mataupu lava lea o le tatou va faafeagai ai ma le tatou lagolago mo le Malo o Isaraelu. Ua maua talu ai nei, ua tatou see tatou te neutral i le lagolagoina o le mau a Isaraelu e avea Ierusalema ma tulaga o le nofoaga tutotonu o le Nuu o le Atua. Ou te tatalo atu ma lou agaga faaaloalo ma lau tuualalo i le Maota, ia tatou silasila i le tatou Faavae ua uma ona tatou osia ma le Atua. Ou te faamanuia ia te oe o le faamanuia i Lou Nuu, ou te fetuu ma ou faamalaia ia te i latou, latou te faia le tulaga i Lou Nuu.

E le aoaia e Laupua Tamafaiga i lau Afioga i le Fofoga Fetalai, ae na o sina upu i a tatou sui i Malo i fafo, ia alofagia, o lea faatoa uma nei lava ona pasi le tatou Faavae, Faavae i le Atua le Tama, le Atua le Alo, le Atua le Agaga e limataitaiina i tatou i le Afioga a le Atua.

E faaiu manatu o lenei itumalo lau Afioga i le Fofoga Fetalai...

FOFOGA FETALA: Malie se i tulai atu le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e taua le tuualalo a le sui usufono, ma o le mea foi lona o lea o lo o fai. Ae e i ai foi le tofamamao e tataua ona limataitaiina ai lo tatou Malo. E moni o Isaraelu o le Nuu o le Atua, a o Isaraelu e le i uma lana sala i le tulaga o le nofo ma faasatauro lo tatou Alii, ma o latou lava na alaga, -ia i luga pea o matou ulu ma a matou fanau lo matou malaia. O le ala lona o lea e ala ai ona tau le ao tau le po. O le Nuu o le Atua sa tataua ona i ai le filemu, ae o le Nuu foi na toe nonofo lava ma toe fetuu i latou, ia i luga o a matou fanau la matou sala, ma o le taimi e uma ai le sala lona, e faatoa maua ai le filemu moni o Isaraelu.

Na o sina faaopopo atu leaga ae tatou te faitau Tusi Paia uma lava, e i ai taimi e faaoga ai foi le tofamamao a lo tatou Malo, ina ne i te i ua tupu ia Samoa mea la e tutupu i o.

FOFOGA FETALAI: Malo. Ia tulai mai le sui usufono.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

Susuga Hon LAAULI LEUATEA POLATAIVAO FOSSIE SCHMIDT: Faafetai. Na ona tata logo atu pea Masefau, leaga e le mafaia e se isi ona suia upu o le Tusi, ua uma ona poloaiina e le Atua, ae taatia ai faapena. E lagona ai foi le leo ma le tuualalo a lo tatou Malo i le faautautaga tatau.

E faaii lau tala lau Afioga i le Fofoga Fetalai, o le Aso Sa na tea sa fai ai le fono a le matou ekalesia e faatinoina ai le Tulafono ua pasia e lo tatou Maota, e le toe oo sou leo i le Tulafono ua pasi e uiga i le faiga o lafoga o faafeagaiga. Lau Afioga i le Fofoga Fetalai, e le i faigofie le matou fono, ona ua amata ona agai le failautusi ma nisi e tapena le faatinoga o le Tulafono ua uma ona pasi. Peitai, ua i ai le tusi ua taunuu atu i le matou ekalesia, fai mai le Fonotele i Malua, e taofia ai faafeagaiga uma a le Pulega ma le Matagaluega, ia aua, aua ne i faatinoa e se isi le Tulafono, se i vagana ua uma ona pasi aloaia e le Ekalesia ma le Fonotele i Malua.

Lau Afioga i le Fofoga Fetalai ou te momoli atu ai le talosaga....

FOFOGA FETALAI: Se i tulai mai lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ua uma foi ona oo mai ia te au le tusi lena, e maioio a ia mea, ma o lo tatou Alii na fetalai, ave pea a Kaisara ia Kaisara, e le feaiaai, ma o le Tulafono ia e agai tonu lava i le faifeau, e le agai ai se ekalesia, o lona uiga e tietie lava i luga o le faifeau ia le tulaga e pei lava o tatou, a le tologia lava le lafoga a le tagata, e tietie lava ia te ia ia le Tulafono, ma o la e i ai faifeau ua leva lava ona totogi a latou lafoga. Ae i ai la faifeau e le i....o lea faatoa oo i ai, o la foi ua totogi lafoga a le toatele o faifeau. Ae o le mea ia, e le amoa toatele le Tulafono, e amo lava e le faifeau ia lona ia faaletonu pe a soli le Tulafono.

FOFOGA FETALAI: Ia se i tulai mai le sui usufono mo Falealupo.

Afioga Hon Aeau Peniamina Leavaiseeta: Ae pe o lea e tau le o malamalama lelei, o le Afioga i le Palemia ma le sui usufono o le Malo, pe strong cufflet, a o lea e talanoa i mea a le EFKS, ia a o mea foi ia o mea maualuluga foi ia seiloga....a o lea la e fia malamalama ai, po o le a tonu le agaga lea e fesootai ai le mataupu lea, ae tuu mea a le EFKS.

Susuga Hon LAAULI LEUATEA POLATAIVAO FOSSIE SCHMIDT: Faafetai i le faauilavea a le Afioga i le sui usufono mamalu. Lau Afioga, o au nei e le tasi se ekalesia e tautua ai, o ekalesia uma e i totonu o lou itumalo, o ekalesia na ou te tautua ai, e le mafai ona alofia le mea lena. Ae ona o lou tofiga faa-Aoao Fesoasoani, matua, senior a le ekalesia i Alamagoto, o lea ou te tulai atu ai e faaleo le finagalo o le Fonotele, o le Fonotele i Malua e leai lava se faifeau e ulavale i ai, no one, a e sasi, e ave oe faatutu i Malua ae aoai oe.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

O le popolega lena lau Afioga i le Fofoga Fetalai, o fea o le a matou faalogo i ai i le tulaga faaekalesia, o fea? O le agaga lena o lea ou te faaoololomaau ai i lau Afioga i le Taitai o le Malo ma le Minisita, ni fa au, o Iuni, Iulai e faia ai le fonotele ona pasi ai lea o le mataupu leni. Ona aumai aloaia lea e momoli mai e fai le finagalo o le Malo, o lea ua pasi le Tulafono...

FOFOGA FETALAI: Se i onosai mai lava le sui usufono, se i saunoa atu le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai o le mea e fia faasao. A o au lea ou te tau fesili atu i le sui usufono po o le mea ea o ia o le sui o le ekalesia po o le sui usufono o le itumalo? Aua o lea tatou te omai o tatou o sui usufono o tatou itumalo.

FOFOGA FETALAI: E faamalulu atu i le sui usufono mamalu, na ona fautua atu le Nofoa, leaga o lea sa tatou i ai uma lava i i i le talanoaina o le mataupu. Ona ou te tau fautua atu, o lea o le a tatou toe talanoaina le mataupu ae uma ona pasia le Maota, ae sa tatou i ai uma lava i i, ou te le i faalogo lava o e saunoa i ai i le itu lea. E faamalulu atu foi i sui usufono mamalu, se lelei lava lo tatou vave maua o se tala i le sui usufono mamalu mo Gagaifomauga Nu.3, ae le i oo i le Fonotele a Malua i le tausaga leni, ioe, o lea o le a tatou talanoaina le mataupu ae le i fonole Fonotele i le tausaga leni. Ma e ou te faamalulu atu i le paia o le Palemene, taoto ia lou finagalo le sui usufono mo Gagaifomauga Nu.3, malie o oe foi o lesi toaina sa e seei foi i le Nofoa i le Fofoga Fetalai e see atu i le Kapeneta, ia a o lea ua e toe see atu i ina, e a pe a taoto ia se i...o lea foi, o le tusi lena ua e silafia faatoa oo atu ia oe, ua leva ona oo mai i le Palemia ae le i aumaia lava i totonu o la e silasila lava i ai le Kapeneta.

Ia tulai maia e faaii mai le saunoaga.

Susuga Hon LAAULI LEUATEA POLATAIVAO FOSSIE SCHMIDT: Lau Afioga e na ona ou oloolo pitovaa, ma aleaga ma alepuna. O le finagalo lea ou te momolia atua, o finagalo uma lava o faafeagaiga o lou itumalo, o la e faafofoga mai, I have to obey them, e momoli le feau i lou avanoa ua maua, pe ou te tiakono pe ou te aoao fesoasoani po o le a, e momoli atu, leaga e le o se mataupu faigofie lau Afioga i le lagona o le ekalesia. Na ala ona le faia se manatu i le taimi ua sola, o le saunoaga a le Minisita, everything is fixed, malie, malie, malie, malie. O le a la i le taimi leni? Ia o lea faatoa mapuna mai mea ia i luga, o le ala lea o le avatu. Ina ne i pea ane ua le mautonu le ekalesia, le mautonu tagata lotu, po o fea o le a faalogo i ai, o le manumanuga lena lau Afioga i le Fofoga Fetalai, lea e mafua ai ona ou faaoololomaau, ni fa au, alolofa, amanaia le Faavae o le Ekalesia, se i fai le fonole Malua, momoli mai lea, pe talia pe le talia, ae ua ui faiga faavae e faamamalu ai le Faavae o le Malo o Samoa ma le Faavae o le Ekalesia.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

O lau tuualalo lena lau Afioga i le Fofoga Fetalai, e tuu atu pea i le Malo e fai lava la outou pule, yours Government is Government, Law is Law, a o lau faamanatu lau Afioga i le Fofoga Fetalai, man make Laws, man change Laws. Ia fai le mea e toa ai le atunuu, aua tatou te faia se mea e taitai ia faamatau, ae oo i le taimi mulimuli ona le iloa lea e le faifeau lea pe kuli e le ekalesia, o fea la le mea e matou te o i ai e sue mai ai le matou faifeau? O le agaga lena lau Afioga i le Fofoga Fetalai, e momoli atu ma le talosaga o lena e i ina le tofa lau Afioga i le Minisita, ia e seu silasila lava i Faavae o le Ekalesia, e fai lava lau pule, o lea ua faataunuu lava mea uma e tusa o lou finagalo. Ae o le mea ua tupu mai ua vevesi, e tataua ona tau atu. Ae ese lava faaupuga ia e oo atu, ese le mea lea e tupu.

E faaii sau tala, lau Afioga i le Fofoga Fetalai, o se upu ua laavale, faamagalo Laauli i upu ma tala. O la e faafofoga mai lou itumalo, ia toa pea le tai. Ia tatou maua le Agaga o le Atua aua le faasologa o tatou galuega mo le lumanai. A o lou toe taunuu mai i lenei itu o le Maota, I feel more comfortable, I am free to speak, ua uma le taimi o le mea lea o le taotaomia, faasinoinomia, mea na, a o le agaga, I think this is where I belong, Parliament, ua ou toe sau e tautua lau Afioga, tautua i lau Afioga i le Fofoga Fetalai ma le Palemene o Samoa.

FOFOGA FETALAI: Ia finagalo malie lava, se i tuu atu i i se i aumai foi se tala malie a lea sui usufono, leaga o lea ua e faamamafa tele, pei ua tu holy tele oe, saunoa mai.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai, ese le matagofie o lenei taeao, se o lea faatoa ou faalogo i le finagalo matagofie, e 13 tausaga o ou i o, a o lea la ua ou iloa, ua leva ona tataua ona i o le sui usufono mo Gagaifomauga Nu.3 ae ou sau iinei. E pau lava le mea lea e fia faasao lau Afioga i le Fofoga Fetalai, e leai lava ma se isi lava o matou o taotaomia, ioe, we are also free to speak our mines anytime we want to, ae faamanuia faafetai Laauli, o se taeao fou ua matagofie i le faalogologo atu i finagalo ua e oo atu i ina avatu le malosi i le sui usufono mo Salega Sasae ma le vaega o lo o i ina, e vaivai tele, faafetai.

Tofa Olo Fiti Afoa Vaai (Salega Sasae): Lau Afioga i le Fofoga Fetalai ona o lea ua taua lou igoa. Na ona ou fia fesili atu lava i le sui usufono mamalu i lenei itu. Po o a mea ia e taotao ai le la vaega, po o ni maa taotao tainamu? Vaeatu le paia o le Maota ma le faafofoga a Samoa, ia ou te le iloa foi e i ai ni mea faapela, a o lea la faatoa ou malamalama nei, e tofu lava le vaega la ma taotao, faafetai.

FOFOGA FETALAI: Ia se i ou fesoasoani atu lava. Malie le sui usufono mamalu, e agaga foi le fesiliai o finagalo o le Palemene.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

Ae o se lagona faa-Nofoa e limataitaiina ai le tatou galuega, o le tatou i ai i Fonotaga a le Palemene o tatou o sui usufono, o lupe sa faia mai i le fuifui mai lea itumalo ma lea itumalo, e tatou te omai e tatou te galulue i upufai o Malo e saili se manuia aua Samoa aoao, ioe. O le maitau atu ma le agaga faanoanoa lava ona o lea ua tatou toe talanoa ma faamamafa i le sui usufono mamalu o lo o saunoa ia le mataupu lenei ae ua pasi le taimi. O le mafuaaga foi lea sa ou avatu ai i se faaupuga malamalamagofie ia le mataupu lenei, sa tatou faatasi i le mataupu lenei na pasia, ou te le i faalogo i se finauga faapea na faatulai mai, ae talu ai o lea e fou lenei taimi, ae sese i Sini le taimi ua laga ai le mataupu lenei. Ona o lea ua fesiligia, po o fea le itutino e tataua ona usitaia e le Palemene. Ae silasila foi, o le filifiliga o tatou e avea ma sui usufono o le Palemene, ua maea le tatou galuega sa faatautoina ai i tatou e avea ma sui o le Palemene ma Taitai o le atunuu, ioe, e faatautoina ina ia o tatou tausia tulafono ma ia faapena ona tatou faatino le tatou tautoga, ina ia tatou tausia Tulafono Tumau o le Maota. A o lea la ua maitau atu, o lea ua tatou i luma, luma, o lea o le a tatou toe foi i tua. E faigata ona ou talanoa atu i lea itu aua pei e.....E ala ona ou taua le itu lea o se upu e malamalamagofie ia aua ne i toe tulai mai. Ia malie ia le sui usufono e faigata ia te au le avafatafata. Ae mo le lumanai, aua ne i tatou maua i le mea lea, a Minisita ona ioegofie lea, ae a le toe Minisita ona faifai lea i a tatou Tulafono ma tatou faaiuga ua uma ona faatulafonoina, leaga o la e maitau mai Samoa. O le ala lea o lou fai atu, e feagiai lava finagalo ae pisia ai fofoga, ioe. E lelei le faafogafoga ma le tapuai mai a Samoa ma le Aufaitatalo, o tatou o tagata lolotu. A e i ai le upu foi lea a lesi toaina, aua le soona aloa lau foe leaga o lea e pisi mai leaga o lea e afaina ai fofoga o isi, e afaina ai fofoga o le Malo. Ia o lau fesoasoani atu lea.

Ae malie ia e faaii maia le saunoaga a lau Afioga i le sui usufono mamalu.

Susuga Hon LAAULI LEUATEA POLATAIVAO FOSSIE SCHMIDT:

E asuasua atu vaimalu i puega i lau i le Fofoga Fetalai, ia o le a le toe solia vasaga e tusa o lau faatonuga, a o la e faafogoga Samoa i lau upu na avatu. E manino lava lau Afioga, ou te le toe tautalagia le Tulafono Tau Faaofi ua pasi, a o mea na tupu ananafi, e faatonutonufolau ai le aso. O le ala lea o lou momoli atu lau Afioga, leaga e le mama. Ae ui o lea, o le a muliau se taofi e na ona momoli atu.

O le saunoaga a le sui usufono lea ma le sui usufono lea, ou te le tali i ai, I don't waste my time, they are jokers, ioe, ou te le tali i ai. O a upu ma tala, o la e silafia lelei mai lava e le atunuu le tagata ma lana galuega la e fai. O la e silasila le Atua i le galuega a le tagata ma lana galuega o fai.

Ona ou manatu lea, le paia ma le mamalu o le tatou Palemene i lenei aso, folau i lagima. Lau Afioga i le Taitai o le Malo, Afioga i Minisita, o upu o le alofa e tuusao atu lava, ia outou galulue i ai ma faatonutonufolau lo tatou atunuu ina ia manuia. Afai foi matou te gugu, e le tataua ona matou toe nonofo i inei, e tataua pea ona matou....

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai....

FOFOGA FETALAI: Ia se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o upu foi o le alofa e fautuaina ai le sui usufono. E le aumaia mea faale tou ekalesia i le Fono lenei. O le Fono lenei e lautele le mea e agai i ai ma o le Tulafono ua pasi, ua uma, ae le faapea e aumaia mea faale tou lava ekalesia e aumai i totonu e lote ai e le o ni mataupu o le Fono lenei, ma ua uma ona tatou asa le ogasami lena. O tatou uma lava tatou te lolotu, ma o lea foi tatou te iloa lelei le Tusi Paia ma le standing o le Tusi Paia i mea nei tau lafoga. O le isi lea mataupu na agai tonu lava i ai lo tatou Alii. Ou te le malamalama po o fea le vaega o le saunoaga a le Alii o lea e aumai e totogi lafoga a o fea le mea lea e auala mai ai. O le ala foi la lena ia tatou a aumai ni mataupu, tuutuu loloto la outou tofa, ae le o le aumai lava o lea mea ma lafo mai i totonu iinei i o le Palemene. Lau Afioga i le Fofoga Fetalai, o mea lava faale-Ekalesia, tuu ai i tua a outou mataupu, o la e i ai la outou tofamamao e fai ai, ae le o le aumai iinei e lotea tele e le Palemene, ua uma le matafaioi a le Palemene i le tulaga lena, o lea ua saunoa le Fofoga Fetalai.

FOFOGA FETALAI: Ia faaiu maia le saunoaga a le sui usufono, malie le sui usufono o lea ua maea lou taimi.

Susuga LAAULI LEUATEA POLATAIVAO FOSSIE SCHMIDT: Afai e paopapa, ia malie afenoa le finagalo o lo tatou Malo. E molimoli atu e tuu atu i outou tafatafa e liuliumalie i ai la outou tofa, a o le mea o lo o matou taumafai atu ai, ia toa ma filemu le tatou savaliga. Ia folau i lagima Samoa la outou faafofoga, ia mau pea le toovae ma outou tapuaia faiva a lou Palemene. O le faagasologa mo le lumanai, ia maua le tofa o lau Afioga i le Fofoga Fetalai ma sui usufono mamalu uma o le Palemene o Samoa, ae maua se ola o lenei tootoo. Ia manuia le Fono.

FOFOGA FETALAI: Malo faafetai. Ma o lea lava e maua le avanoa mo le saunoaga a se isi sui usufono mamalu ae tatou te le i oo atu i le tatou malologa masani.

Ia atonu o lea pei ua faatutugata, ae o le a tatou alo i le tatou malologa masani, e tatou te foi mai loa, e mafai lava foi ona tali le Malo i sui usufono pe toatolu lava pe toalua sui usufono e saunoa, tali loa le Malo pe afai e faatutugata.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

Na faataatiaese Galuega a le Fono Aoaofaitulafono mo lana malologa masani i le itula e 10:36 ma toe faaauau i le itula e 11:13 i le taeao.

Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2017/2018.

FOFOGA FETALAI: Ou te faasilasila atu ua toe amatalia Galuega ma Taulumaga a le Fono Aoaofaitulafono.

Ua ou manatu ua maua le suiga o le faasiliga malosi, ua matu i fau le taliga o le sua ma le taumafataga aua se suiga o le malosi faafouina aua le tatou galuega e faaauau ai. Ma e faia le malologa o lo o faapena ona tuu atu le avanoa i le mamalu o sui usufono o le Palemene mo a latou saunoaga e tusa ai o le Tala Faatatau Faaopoopo o le Tupe.

Ma o le avanoa foi leni ou te tapa ai ma le agaga faaaloalo le paia o le outou mamalu, i se sui usufono e tulai mai e faaauau le saunoaga.

Ia ua maitau atu ua tulai mai le sui usufono mo Falealili Sasae lau Afioga i le Gafatasi, tulai maia e saunoa aua sou sao, ae a le tapuaiga a le itumalo.

Afioga FUIMAONO TEO SAMUEL TEO (Falealili Sasae): Ou te manatu o lea ua matu fau i le tauteaga ma le taligasua, e manatu foi ua i ai le faasiliga malosi i le Taitai o le Malo aemaise o lau Afioga i le Fofoga Fetalai, ae a le Aiga Kapeneta ma le mamalu o sui usufono o le Palemene.

E manatu e tulai e fai se sao o leni itumalo aua le Tulafono Tau Faaofi o le Faatatauina o Tupe Faaopoopo (Nu.1) 2017/2018 o lo o taoto nei i le Maota. E piiama se lagona i le faafetai e pei ona fofogaina e nisi o sui usufono mamalu. Ona i ai lea o le lagona e le toe alo i tua sa matou faamatalaga. A o upu a le atunuu, -a faufau pupue galu feai o le sami, e faailomala peau o le matasaua. Peitai o lea ua to i tua Apolima ua tino le soifua ua gotouga le 2017 ua taitai filemu mai lo outou soifua ma le ola i leni taeao fou.

E faatalofa i lau Afioga i le Fofoga Fetalai o le pa ma le vavao o le Maota aemaise o le galuega faatino o lena tausaga ua tuanai, faamalo, faafetai mo le faatautaiga o le Fono. Avea foi leni taimi e momoli atu ai le agaga faafetai tele i le Malo e tusa ai o galuega faatino o lena tausaga, e le faigofie la outou pitolaau, ae tatou tatalo faatasi i le Atua e foai mai le tamaoiga o mafauauga ma le sosia o le poto ma le tamaoiga, ina ia taitai ai le Malo, e fai ai tatou ma meafagaluega e faatino le galuega aua le Malo o Samoa.

Ou te tulai atu e lagolagoina le Tala o le Tupe e pei ona taoto nei. I le lagolagoina o le Tala Faaopoopo o le Tupe e i ai nai tuualalo, e i ai foi ma nai fesili e le tele. A faitau ma le totoa i leni taeao i le Lipoti e pei ona tuuina mai ma fuainumera, ona i ai lea o le lagona ma tuufesili e faapea; afai o lea ua uma ona fuafua le galuega ma ua taoto le ata, o lea na amata mai le \$7.5miliona, o lea ua oo i le \$9miliona le tau o le galuega o le falepuipui.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

O le upu moni lava, o lo o i ai nisi vaega o lo o faamalumu mai e pei ona taua i le Lipoti a le Komiti o Tupe. O lo o i ai nisi o fale e le i maea ona fausiaina o lo o fuafua foi e fausia. A o le fesili e tuuina atu i le Afioga i le Minisita, afai o le a pasia nei le Tala Faaopoopo o le Tupe leni, po o le tauaofai la leni o le galuega o lo o fausia ai? Po o le a toe aumai se isi Tala Faaopoopo o le Tupe i se tatou Fono o lumanai?

FOFOGA FETALAI: E faamalulu atu i le saunoaga a le sui usufono mo Falealili Sasae, se i tali atu le saunoaga a le Afioga i le Minisita mo Tupe Maua, le o lo o feagai ma le falepuipui.

Afioga Hon Tialavea Fea Leniu Tionisio Hunt: Faafetai i lau Afioga i le Fofoga Fetalai. Ou te talitonu ua sosoo sui usufono nei e fetalai mai o lo o lotea le mataupu i le falepuipui. E sili ia la ona tali atu e faamalalamalama atu le vaega lea, ae lavapapale mai po o le a le umi o le a faamalalamalama atu ai.

O le galuega lea i le falepuipui e fai sina tele, e i ai tupe alu i le faiga o le vai, e i ai tupe alu i le faiga o auala. O le eletise ua avatu, atonu o la e ua i lalo o le CSO le eletise. O le pa, e i ai le pa e fai. O fale ia na tauofo i le Tauofoaga lea na fai, na o sela lava i totonu o le falepuipui, e le i aofia ai le envi block, e le i aafia ai le faleaiga e fai ai taumafataga, o le umukuka, o le fale fomai e vaai ai pagota, o le tower mo le galuega, o le fale e suesue ai pagota pe a avatu i totonu, o taimi uma e avatu ai e i ai le galuega e fai i totonu o le fale lea. E le i faatupea la le galuega lea, o le estimate lava ia o le galuega lea na tuu e fai i totonu na o le faiga o le falepuipui lea, e \$10miliona. E alu atu le Tender i tua ae sau e \$7.4miliona le tau, ona aumai lea i Main Budget le tupe e \$3.7miliona e amata ai le galuega lea ae se i oo i le Supplementary ona aumai lea o le isi \$3.7miliona ona \$7.4miliona lea o le galuega la e faatino nei na o totonu lava o poloka nei e nonofo ai le au nofosala. E le i faia foi le pasima lea e ave ai le vaega lea faafitauli, high security fence cell lea, e le i faia, e alu ai tupe. A o le tupe a fuafua i galuega uma o le falepuipui pe a fai, e \$20miliona, o le tau lena e tatau ona oo i ai, a o le utiuti o le faasoaga le Matagaluega o Tupe, lea e ala ai ona fai auauai. E le mafai ona maua atoa se tupe e fai ai le galuega lea. O lona uiga a aumai ua le faia galuega o aualatetele, o vai o tatou nuu.

O lea la e faasoasoa. Ina ia faamama pea le avega o le Tala o le Tupe, o lea e faamoemoe o isi galuega e fai, a sifi le falepuipui i Tanumalala ona faaoga atu lea e tala atu isi fale ia e lelei i Tafaigata e fai ai isi fale mo le nofoaga o le falepuipui. E tolu sifi o le galuega. A oo nei ina o i Tanumalala, o le sifi o le Falepuipui i Tafaigata i le taimi nei. O le taeao, sifi o le afiafi, e manava i le 12:00 i le po ma le sifi o le 12:00 agai atu i le 8:00 i le taeao. E i ai foi ni fale e fau e faaleoleo mo le galuega e nonofo ai e i le sifi po.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

E le mafai ona manava i le 12:00 po o le 1:00 i le po se sifi ona omai lea i le vaeluapo e tatau ona malolo ai se i malama le taeao ona usu mai lea o le taavale lea e usu mai e avatu le sifi o le taeao ma aumai nisi e suia latou ia, faatasi ai ma le vaega lea i le taeao, seia ta foi le 4:00 toe piki atu. O isi tupe faaalua o le galuega lea, e mamao le falepuipui o le a i ai, ma e manaomia foi le seleni o penisini o taavale, ona e matua mamao lava le galuega lea e fai. O le tele na o isi tupe ia e faamoemoe mo le galuega lea. O le taimi nei e leai se variation o fai, o la e i ai le komiti o le galuega lea latou te faatinoina, o a uma galuega a latou, ae faafetai i le Komiti o Tupe, na alu atu le latou asiga o le galuega lea, na o latou la e i ai le tali, po o faaaoga lelei le \$3.7miliona lea na avatu i le paketi o Iuni.

Ua ala ona faamalamalama atu ona o lea foi ua tulai mai le isi sui usufono o lo o lavea mai ai le falepuipui, a faatupe la estimated costs pei la o galuega uma ia ua avatu o le vai, o lea foi e tau aumai se matou tanevai e 500,000 lita e ese mai le mea lea e fai e le Suavai, ia alu uma ai le vai lea i totonu o fale uma nei, ia alu i totonu o le tane lea, ia aua ne i toe motusia le vai taumafa. O le mea lea e i ai Tafaigata e lau i taavale, e i ai lava taimi, a faaletonu le vai, e leai se mea e aapa i ai le Matagaluega, o le tatala mai i tua o pagota i o latou aiga aua ua leai se vaitaumafa, e le mafai ona nonofo ai pagota i totonu pe a leai se vai. O le mea lea sa fai i Tafaigata. Ae faafetai i le Pulega o le Suavai, o la e ua maua atu le paipa e alu atu sao lava i luma o le gate i Tafaigata e tau i tanevai o lo o i tua ua uma ai le tulaga lena i le tele o tupe sa alu i le lau atuga o vai e kamupani vai.

O le faamalamalama atuga lena o le galuega lea e i Tanumalala, ne i te i ua i ai se isi e le malamalama i le galuega, a o le galuega o lo o faaauau pea i le taimi nei. E pei lava ona fai atu, o lena ua oo atu le asiasiga a le Komiti o Tupe i le galuega, o latou la na o lo o i ai le tali i le tulaga ua oo i ai le galuega lea o le falepuipui, ae le i afa le galuega, a o lea e faamoemoe ia tulituli i le faaiuga o le tausaga lena e sifi ai le falepuipui i Tanumalala ona ua manaomia le sifi.

O uta i le falepuipui i le taimi lena, e tai 40 i le sela, a o sela ia e le o ni tamai poloka. A outou tagai i le mea o lo o taoto ma felavasai ai pagota, ia ona outou iloa lea o le eseese o le tulaga o lo o i ai i le taimi lena. O la e overcrowded uta i Tafaigata ona o e lava e nofosala, ae faafetai o la e ua faia le falepuipui fou aua foi le nonofo ai e le gata i Tafaigata, a o lea foi e atinae Oloamanu. O le nofoaga lea sa fuafua mo tamaiti. Afai e fua i tamaiti e tatau ona ave i Oloamanu, e toatasi pea lava le tamaitiiti la e i uta e entitle i le falepuipui lea, juvenile, le falepuipui mo tamaiti, ae 300eka le fanua la e fia develop. O lea lava la e tau atiae. E faapena foi la i Vaiaata, faafetai i le SLC o la e ua aumai atoa le 170eka e amata ai le matou faatoaga commercial farm ina ia mafai ona sustain le falepuipui mo a latou lava taumafa. E 170eka la e ua i o i Vaiaata ma le 300eka na aumai muamua ona 470eka lea o le fanua i Vaiaata.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

O le fanua lea e i Tanumalala, e tele, e 300eka foi la e i ai, ae gaoa, e le mafai, e laitiiti lava se avanoa e faaaoga e fai ai le fofoga taumafa, lea o le a faaaoga e fai ai lafumanu, ae faaaoga falepuipui ia e lua, ma o lea foi ua amata gaoioiga o la e ua faaopoopo pagota i nofoaga ia e lua i Vaiaata ma Oloamanu aua lava le galueaiina mai o le fofoga taumafa. O le taimi nei o lo o tele le talo i Vaiaata, a outou fia fai tagatalo, e maua le avanoa e faatau ai tou talo i i.

Ae pei o le tala atu lena i le galuega i Tanumalala, e oo lava i le \$20miliona pe a faatupe uma lava galuega uma, mea taitasi, ae o le utiuti o le faasoa a le Minisita o Tupe. Ma lou faaaloalo lava lau Afioga. Faafetai mo le avanoa.

FOFOGA FETALAI: Malo faafetai. Ia, tulai mai le sui usufono mamalu e saunoa e le o toe tele foi sou taimi ua alu uma i le faamalamalamaga o lau fesili.

Afioga FUIMAONO TEO SAMUELU TEO: E pei ua faaluafesasi foi le faamuamua atu o le mataupu lea ua alu ai le taimi ae le afaina o lea ua manino. Ua avea foi lau fesili ua manino ai le toatele. Aua o lea e manino le Tala o le Tupe Muamua, o lea na aumai atoa ai le tau o le falepuipui, a o lea e pei e autilotilo atu i le Lipoti a le Komiti o Tupe, o lea e i ai ma isi vaega. O le ala fesili lena ona o lea e faamalumalu mai nisi o galuega e le i faatinoina.

Ona oo mai lea o le faamatalaga lau Afioga i le Fofoga Fetalai, e avatu ai se tuualalo i se isi Tala Faatatau Faaopoopo o le Tupe ina ia tagai ane i ai le tatou Malo. Sa ou asiasi foi i nisi o aiga o lenei itumalo, ou te talitonu foi e le na ma le laina le lautele o i latou e faigaluega i lalo o le minimum wage foi lele e \$2.30 sene i le itula. Pe le ua alagatau ona toe tagai i ai e sii laitiiti i luga le tatou minimum wage. A fua i ai i le tau o le soifuaga lea ua i ai ma le tau o oloa, o lea lava ua siisii malie i luga, a o lo o tumau lava le tatou minimum wage e le gafatia e le tama po o le teine faigaluega i galuega pei o faletalimalo, o galuega foi ia e totogi i le tupe lea. Afai e usu mai i tua i Falealili e totogi le pasese i le pasi ma toe alu. E uma lava le totogi afa le totogi i le pasese, o lona uiga na o le taga araisa e lava ai i le totogi. Ae na o se tuualalo e avatu i lo tatou Malo, pe le mafai ona toe tagai ane i ai ina ia mafai ona i ai se siitaga o le tatou minimum wage ina ia mafai ona siitia foi totogi o i latou o faigaluega i galuega faapea.

E momoli le faamalo i le Afioga i le Minisita mo Faatoaga ma Faigafaiva, aemaise foi o le galuega sa faatino e le uso a Minisita ua tuanai atu, o lea ua faaauau mai lava e le afioga e le Minisita fou, mo le togi lea ua togi i tua i itumalo ia faamallosia le afe tiapula. O lea la o le tatalo, ia toe tuutuu laitiiti i luga le totogi lena ina ia mafai ona aua nei motu le tatou sapalai. O le mea lea ua i ai nei, ua tele le talo, ua laitiiti ia tatou faitotoa. Ua oo foi i le taimi e avatu ai le manaoga i taga talo e manaomia e le itumalo, ae ua alu atu le tala ia i latou o lo o avea le talo i fafo ua faatapulaa atu le fuainumera. O le a avea foi ma auala e faapalapala ai le faifaatoaga i le galueaina o le tatou uta aua foi le tamaoiga o lo tatou Malo.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

E momoli atu le faafetai i le Afioga i le Minisita mo Galuega, Felauaiga ma Atinae Eseeese, ou te iloa o le tele o tatou auala ua faaletonu. Ae faafetai, e tasi le auala o si ou itumalo o lea ua tanu talosia ia avea le timu lenei ma auala e faapapa lelei ai, ma maua ai se taimi e ta ai i se taimi o i luma ma le agaga faaaloalo, o le auala lea i Utulaelae faamolemole.

O le tulaga i le fausiaina o fale ma le agaga faaaloalo, e lagona e lou sui usufono le tulaga o lea e duplicate le galuega a le Matagaluega o Galuega aemaise o le Matagaluega lea o le PUMA, o nisi o tatou Matagaluega nei, ua faafaigata ona maua se pemita foi i le fausiaina o le fale, ona o le tele o vaega e alu agai i ai. Ae pei e foliga e toe iu lava i le mea e tasi, pe le i ai se auala e mafai ona faafaigofie e tuu faatasi ai ina ia mafai ona faafaigofie i le tagata mai tua, ia mafai foi ona faatino ni ata standard drawings, ina ia mafai ona sau le tagata o lea e le malamalama foi lea e tatau ona i ai se ata o le fale, a o la ua tuu i ai le ata o lo o taatia i le Matagaluega o Galuega e filifili ai ia po o fea o ata nei e tatau ona fausia ai lona maota, ina ia faafaigofie ma totogi ai loa. O nisi vaega o lenei galuega a lenei itumalo, ou te manatu lava e i ai se taimi mulimuli o le a toe maua ai se isi avanoa.

Ae avea lenei avanoa e faaiu atu ai sau faamatalaga e momoli atu ai le faamalo i lou itumalo o Falealili Sasae. E ui lava ina ua vaeluaina aloaia lo tatou itumalo, ae e le mafai lava lo tatou vanonofo ai, le Alalagafa ma le lua nofo i Tulafale ma le Tauanaeseese ia Falealili, ia faamalo tatalo, faamalo tapuai. O le a foi so tatou sao i la tatou Faigamalo, ia tatou tatalo ai i le Atua e fai lena mo i tatou.

Ia manuia lau Afioga i le Fofoga Fetalai, manuia lau Afioga i le Palemia ma le Kapeneta, sui a Minisita aemaise Sui Minisita Lagolago, Taitaifono o Komiti eseese ma le itu agai, faagaetia foi le lagona o lea ua i ai iinei le isi sui usufono malosi o la matou itu agai, e faatautaia atua lenei itu o le Maota. Ma lou faaaloalo tele manuia la tatou Fono.

FOFOGA FETALAI: Malo faafetai saunono. Tulai mai le isi sui usufono mo nuu Tu taulaga Sisifo

Afioga FAUMUINA ASI PAULI WAYNE FONG (Itumalo Tu Taulaga Sisifo): Faafetai i lau Afioga i le Fofoga Fetalai i lenei taeao, faafetai foi mo le avanoa ua mafai ona maua e faasoa atu ai aua foi le tulaga i le Tala Faaopoopo o le Tupe, faatalofa atu foi i lau Afioga. Afio lau Afioga i le Palemia, lau Afioga foi i le Sui Palemia ma le mamalu o Minisita aemaise nai uo Minisita Lagolago. E faapena foi lenei itu, afifio foi lenei itu, i ona taitai o lea lava ua tau feoloolo mai a matou Taitai i lenei taeao, e foliga mai lava ua tulaga mai i se tulaga lelei.

Ae o le a taumafai atu se vaivaiga foi o lenei itumalo e ui lava ina tilotilo atu i le tatou Tulafono o le a le toe i ai se itumalo, ia ae le afaina. O lea e tele itumalo e mafai ona o i ai e omai ai lau Afioga i le Fofoga Fetalai.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

O le mataupu muamua e momoli atu le faafetai i le Minisita i le tatou vaalele, sa ou alu i Ausetalia i le vaalele lea a tatou, o le manaia ia o le vaalele. E tasi lenei atinae a le Malo ua leva ona tatau ona toe fai, manaia ona fuafuaga uma, ae e i ai lava nai mea e toe fia faaleleia o la e tatau ona faalelei, ona ua oo lava le vaalele i Ausetalia, e le i lagona lava le siufofoga o le pailate, ae faatoa ou iloa mulimuli e le iloa e le pailate ona nanu, ae e le afaina o la e i ai teine o le vaalele e mafai ona latou faatinoa i le vaalele, ua matou iloa ai ma iloa e le pasese, le vaalele lea matou te o ai. Ae o le aotelega lava o la tatou atinae ua matua selau pasene. O lea e momoli atu ai le faafetai tele i le Afioga i le Minisita, ia taumafai atili ia maua se tatou vaalele e lapoa atu i le vaalele, ina ia mafai ona vaelua ai lea o luma ma tua e maua ai foi isi pasese fou e maualuluga atu, na i lo o pasese ia e malaga ai matou i le pito i tua.

E momoli atu foi le faafetai tele i Matagaluega o lo o faaitiitia a latou tupe faaoga lea e sau i totonu, e pei o lea e amata mea ai si ou uso o le Minisita mo Faatoaga ma Faigafaiva. Malo lava le faasoia i lau Afioga, o lea ua toe faaitiitia mai, o o lea e lavea ai ma le Ofisa o le Palemia faapea foi ma le ofisa oí ..lea e maua ai le \$.9miliona ua toe faafoi mai i totonu o le tupe faaoga a lo tatou Malo. O Matagaluega lelei ia, e mafai ona toe faafoi mai, e ui lava ua tapuni le Yasaki o lea sa aumai ai, ae talitonu le agaga o lea lava o lo o maua le fesoasoani aua galuega fai i isi itu.

E toe tasi lava lau fesili i lau Afioga i le Minisita mo Falepuipui, faafetai mo le faamalamalamaga, manino lelei le faamalamalamaga a lau Afioga. O le fesili la, e toe tender la ia le galuega lea pe a faapea ua uma ona fai tauofoga, lea e lavea ai le \$7.4miliona, leaga o lea ua saunoa lau Afioga ua luasefulu, pe toe fai la nisi tauofoga, e toe faaopoopo ai po o le mea o le a faavariation le ova atu i le \$20miliona? O le fesili lea lau Afioga e fia malamalama ai lenei sui usufono.

Afioga Hon Tialavea Fea Leniu Tionisio Hunt: E sili le faatea atu. O galuega uma lava e faatino e tender. O la e i ai le tatou tender process e fai. O tender la ia isi galuega e faagasolo mai o le falepuipui.

FOFOGA FETALAI: O lea ua saunoa mai le Minisita.

Afioga FAUMUINA ASI PAULI WAYNE FONG: Faafetai, o lea foi la ua nofo malamalama lenei sui usufono. O lea foi la o le a toe fai tauofoga ina ia maua ai le \$20miliona.

E talosaga i lau Afioga i le Minisita o le Ofisa o Leoleo, e ui ina leai se latou tupe faaopoopo o aumaia ii, ae e i ai le agaga, o le Ofisa o Leoleo lea e i Faleata, e fai sina tele tele o le area e cover e le Ofisa o Leoleo lea e i Faleata. O le faanoanoaga lau Afioga, e pei lava e le lava taavale e faagaioi ai galuega a leoleo. Ona e i ai le mea sa tulai mai sa valaau mai ai, ae fai mai e faatali se i maua se taavale, ae silasila foi lau Afioga, o le matua fai lava si tele o Faleata Sisifo, Faleata Sasae ma Faleata ogatotonu.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

Ina ua ou oo mai i le Ofisa o Leoleo i Faleata, e tasi lava le nofoa umi e matou te saofafai uma ai, e faasolosolo i ai, e manaia le tele o le avanoa. E manaia atu le tele o le mea lea e tausi ai le taifau foi lea a le tatou atunuu lea e canine i lo le mea lea e i ai nei le Ofisa o Leoleo. E na ona tatalo atu faapena. E aoga tele mo i tatou lea e latalata mai i i, aemaise foi le mamalu o le atunuu. Pe i ai se isi post e mafai ona avatu e tuu i gatai i Vaitele po o gatai i Vaigaga i le mea o lo o i ai le aualatele lea e tele i ai. E leaga e faigata e lelei iina e mafai ona vave ona oo i ai le ofisa o leoleo i faafitauli e tulai mai. Ae na ona taatia atu i ina i lau Afioga, leaga e faigata o lea e le i auamaia se Tala Faaopoopo o le Tupe. Sa i ai foi le agaga i nai leoleo ia ua faamalolo mai, pe le i tau saili le Malo i se galuega e mafai ona faigaluega ai latou. O lea ou te talitonu o lea e i ai le security a le malae vaalele i Faleolo, ua leva ona faalogo foi o lea e tau tapenapena, ina ia mafai ona ave i tua i se Private Company latou te faatinoina lea galuega. Ae pe le agavaa i ai i latou ua faamalolo mai pe ova ma le luasefulu i latou, e mafai ona amatalia ai se company ina ia mafai pea ona faaauau pea le latou galuega faaauau. Sa i ai foi le agaga faapea a i ai se tupe faaopoopo i i, aua sina mea mo i latou o le a malolo, ae faigata o lo o pule lava le Malo i le faasoaina o lana ia pitolaau. Na ona tuualalo atu faapena i lau Afioga.

Lau Afioga i le Minisita mo Galuega, Felauaiga ma Atinae Eseeese, o lea ua matua aliali mai lava le faaletonu o galuega i lenei vaitaimi i timuga. E pau lava le mea o le faataatia atu iina. O auala lelei ia na fai i tai o la ua matua lelei lava. A o tamai auala ia e o i va o isi auala lelei ma isi auala lelei, o auala na o na e faalelelei. E tatalo atu i lau Afioga, se i tagatai ifo i nai auala na, aemaise lava totonu i Falelauniu, o totonu i Vaitele, o Siusega, o Vaigaga ma Vaiusu e matua lelei lava auala atoatoa. E pei o le agaga lena ina ia faaleleia atili la tatou auunaga aua foi le agai i luma. Pau ia o nai manatu lau Afioga i le Fofoga Fetalai, ona ou te iloa e puupuu la tatou Fonotaga. Ae ia manuia lava fuafuaga o totoe i lenei aso i lau Afioga aemaise foi le Kapeneta ma le mamalu o lena itu. Ma le faaloalo lava faafetai.

FOFOGA FETALAI: Malo faafetai saunoa i le Afioga i le sui usufono mamalu.

E tapa ma le faaloalo se isi sui usufono e tulai mai e faaauau le saunoaga. Tulai mai lau Afioga i le sui usufono mamalu mo Salega Sasae.

Tofa OLO FITI AFOA VAAI: Faafetai i lau Afioga le Fofoga Fetalai, ua maua foi so matou avanoa i lenei taeao. E avatu ai foi nai motugaafa ma vaivaiga foi o lenei itumalo, e tusa ai foi ma le Tala Faaopoopo o le Tupe o lenei tausaga fou. O le viiga lava i le Atua tatou te faafoi faatasi i lenei taeao fou. O se amataga foi o lenei tausaga 2018. Ae ou te manatua sopoaga a Samoa i aso ia, e tapena faafafine toaga ia so o se mea, ina ia aua ne i satia i ala se faigamalaga. E talitonu e faapena foi ia tapenaga a le tatou Malo ma tatou uma o Taitai o le atunuu i lenei foi tausaga, tatou te tapena itu uma ma le lototele, aua e le misi lava ma ni puapuaga e fetaii ma tatou.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

E pei foi o le sopoaga a Mose ma Isaraelu i le nuu na folafolaina e le Atua. E le o se folauga sa faigofie i le taitaiga a Mose, e tele faafitauli sa feagai ma ia ma latou uma. E i ai le talitonuga sa lelei tapena ia lenei sopoaga i taumafa ma isi mea uma sa moomia. Ae tasi lava le itu na lape ai lo latou faamoemoe, e le i tapenaina o latou loto i le faamaoni ma le talitonu i le Atua. Ma amata mai lava i e sa ave i ai le faatuatuga o Mose, e fesoasoani atu ia te ia i le taitaiga o le nuu, ia ua solomua ia i latou le ifo i tupua. Ua pule lava le tagata i lana. Ua leai foi se isi na toe popole i le tulafono a le Atua ae fai le mea e loto ai. A o Mose foi ia lau Afioga i le Fofoga Fetalai, e ui o se Taitai iloga ae na i ai foi lona sasi. Ua le usitai Mose i le Atua, na fetalai atu ai le Atua e fetalai i le papa ona puna mai lea o le vai. Ae ita le toaina ma ta i le tootoo. O le a le taunuuga o lenei mea? E le i taunuu Mose i le nuu na folafolaina. Ua le tofo Mose i le suamalie o le nuu lea na folafola e le Atua. E toaitiiti foi tagata Isaraelu sa lava lo latou onosai ma taunuu i le nuu, ma o se nuu manuia, o le nuu e maua ai le soifua saoloto. A o le a se mafuaaga? E tasi lava le mafuaaga, ua toilalo popo i atua o le ala.

Lau Afioga i le Fofoga Fetalai, na o se tuualalo i lau Afioga i le Palemia, ia taitai le tatou atunuu ma le lototele, taitai ma le onosai, taitai ma le loto alofa ma le loto mauualalo. Ia manuia o outou faiva alofiaao i lenei tausaga.

O le lauga a Salega, o le a amata mai sau faamatalaga i le Matagaluega o le Pulega o le Laueleele. Lau Afioga i le Fofoga Fetalai, e fia tatalo atu i lau Afioga i le Minisita, e i ai le faiga faav ae lea ua finagalo i ai lau Afioga, o le a le toe agavaa ai taavale laupasese i le tausaga lea o le 2002 agai i tua. Na o se tuualalo ma le agaga vaivai lau Afioga, e le toe i ai ni au taavale, ae o le a fai au ma sui o nai tagata foi o lo o talosaga mai i le fia maua o se fesoasoani. Ia, e talitonu lava e i ai tulaga lelei o lou finagalo i lea foi vaega, ae paga lea lau Afioga i le Fofoga Fetalai, e ao foi ona e toe seu silasila i lona aafiaga i le mamalu o si o tatou atunuu. Ua ova ma le 200 taavale o le a le mafai ona toe agavaa i le auunaga lea. E ova foi ma le 200 avetaavale o le a le maua ni a latou galuega, ova foi ma le 200 aiga o le a leai nai a latou tamai pisinisi ia e tua i ai i le tausaga o latou aiga, o le faaaogaina o latou fanau ma mea uma lava i nuu ma ekalesia.

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le mataupu lea o lo o faatalanoa i le taimi lenei, ae agai tonu lava i le mea lea e saunoa mai ai le sui usufono, ona o le taua o le latou talosaga na avatu ia te au. O lea la ua felogonai ma le Minisita se i toe tilotilo i ai i le mataupu lea ona o le taua o si a latou foi tuualalo mai i le Malo, a o le mea tonu lava lea e agai mai ai le Afioga i le sui usufono o mea ia o lea ua toe tilotilo i ai.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

FOFOGA FETALAI: Ia, tulai mai le... Malie le sui usufono se i tulai mai le Minisita mo Galuega, Felauaiga ma Atinae Eseese.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese): Faafetai i lau Afioga i le Palemia mo le tali vave atu i le fesili sa saunoa ai le sui usufono mamalu. O lea ua oo mai foi le kopi o le tusi lea na saunoa i ai le Palemia i lou ofisa. Ma e manatu lava ona o le rationale na faatino ai lea tulaga ona o le matau ua tele tele tatou taxis laupasese i luga o aualatetele. Ma o le tele foi o taavale laupasese nei, ua tele tele le solitulafono i luga o tatou aualatetele. A o le agaga lena, o lea ua uma ona talanoa mai le Afioga i le Palemia e toe faatonu le LTA e toe fai se fuafuaga i le tulaga lea. Ma o lea la ua uma foi ona faatonu le LTA, e tapena mai se isi pepa e ave i le Kapeneta e liliu ai le faaiuga lea ona o le alolofa i le aufai taxis ona o le latou foi pisinisi lea e ola lelei ai latou. O le tulaga lea e i ai tatou, e taumafai lava nai tagata vaivai e fai nai pisinisi ia e mafai ona soifua lelei ai latou aemaise o le tautuaina o ekalesia ma afioaga, aemaise aiga. Ae taatia mai o lea ua i ai le fuafuaga i le mataupu lea, ma ou te tautino atu o la e o le a faatino mai, e toe ave le Pepa i le Kapeneta e toe fai le tulaga lea, toe talia pea taavale 2003 agai i tua. Na pau lava a avatu le taavale o la e talafeagai o la e lelei atoatoa, o la e taavavale lelei pau, taofi ma lelei uma tulaga faapena, ona pasia lea e toe faaauau. A o nai fuafuaga ia na tapena ona ua maitauina le tele o taavale laupasese ia e feoai i luga o aualatetele, a o taavale foi nei o lea e faalavelave i le feoaiga o tatou taavale. Ma lou faaaloalo lava.

FOFOGA FETALAI: Malo. Tulai mai le sui usufono e faaauau le saunoaga.

Tofa OLO FITI AFOA VAAI: Faafetai ua malamalama lea mataupu. Atonu foi o la e faafofoga mai nai e foi sa i ai le loto popole i lea vaega, o lea ua to lo outou matupalapala ua talia ma le agaga faafetai e le Afioga i le Palemia ma le Minisita lena vaega.

Ia, ona ou oo mai lea i tatou auala Ua mavae le tele o tausaga ma ua le masino foi finagalo faaalua o sui usufono i totonu o le Maota lena i lea tausaga ma lea tausaga, i le tulaga lava o tatou auala. Ae ua toatele foi Afioga i Minisita sa tauavea le matafaioi lea, a o le upu moni lava, e le i i ai lava se Minisita ua foia le faafitauli lea mai le tele o tausaga ua tea i ni ana metotia. Sa ou manatu lava lau Afioga i le Fofoga Fetalai, e eseese taiala po o specifications e fau ai tatou auala ma auala o isi atunuu o le Pasefika e lavea atu ai ma Niu Sila ma Ausetalia, ae tutusa lelei lava. Ona tuufesili lea o lou mafaufau, pe aisea e taitolu, taifa, tailima masina malepe tatou auala, vaeatu le paia o le Maota ma le faafofoga mai a Samoa, ae taifa i le tailima masina faatoa tau faaletonu mai auala o isi atunuu.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

O le tauloto masani lava ua faalogologo ma outou faafogafoga i ai, o le timu ua mafua ai. Se o lota ma ia i lea tali, e le o se tali professional e tatau ai ona faatino ai tatou galuega.

O au lau Afioga i le Fofoga Fetalai, ou te fealuai lava i lau taavale ma ave au fua e lua, o lau fuakoso ma le fuavai. A oo la ina ou savalivali atu foi lea i le auala ae ou tau atu i se tulaga faaletonu ua pu le auala vaeatu le paia o le Maota, ona ou oso lea i lalo ma lau fuakoso e fua le mafiafia la e alu ai i lalo le auala. Ia manatua foi lau Afioga i le Fofoga Fetalai, o specifications ia e aumai nei o le fausiaina o tatou auala ia lelei atoatoa, e fa layers e fai ai. E amata mai i le sub-grade sub-basecourse, basecourse ona alu atu ai lea i luga o le surface course. E fa layers. O le tele lava o tatou auala, na o le tai lua lava layers ia e i ai, na o le faalamolemole lava o le natural formation foi lele po o le palapala lea e i lalo o le auala, oso ma le ta i ina. O le mea tonu lava lena o lea e faaletonu ai tatou auala. O le tele foi o auala, le mea e mafua ai ona ou oso ma lau fuakoso, se i fua le mafiafia o layers ia, pe maua le 150 milimita o le mafiafia e tatau ona i ai. O le tele o auala na o le tai 23, tai 25 milimita.

FOFOGA FETALAI: Malie le sui usufono, se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, faatoa ou faalogo lava lea o fealuai se faipule ma ni fua se lua e.... Fai pea au fua e lua e le mafai ona iloa ai se malosi o se auala.

A o le tulaga lea i le timu, e le faapea na o tatou e aafia ai. Sa ou vaai foi i le lipoti na aumai o timuga tetele na tupu i Niu Sila, o le matua tetele o mea... o isi mea na ou vaai i ai, e alu ane lava le isi media, na ona tago atu lava i lalo susue sau atoa lava i luga le ta, ae susue i luga i le lima, sau atoa lava le ta i luga. E le faapea la na o tatou e aafia, o la e foi e aafia ai atunuu i fafo. Ae o le ala lena o lea tatou te taumafai ai e faatino aualatetele ia e faatupe mai fafo, e fai sina taugata, lea la e i ai le auala lea e alu atu lava i Malifa e tau i Saina, a o lea foi e toe fuafua isi auala e faatupe mai e le Faletupe o le Lalolagi.

O le mataupu lena o le mataupu ua leva ona faatalanoaina e le Kapeneta ma le LTA ma latou foi o aufai auala, e le o tuuna le tulaga lena o le faatalanoa ma latou, ma ua tele foi taimi o ou tautala mai ai i interviews i le tulaga e tatau ona silasila i ai ia le Matagaluega i le vaega lea e tele nai potholes na e tatau loa ona fai atoa auala. Ae onosai ia taatia mai le galuega o lea lava e le o faapea o laaloa ai le tilotilo a le tatou Malo. O le ala foi lena e le o faalagolago tele foi tatou i fafo o lea foi e fai a tatou suogatupe e faatino ai le anoano o mau fuafuaga o lo o taumafai e fai e aafia ai ma tatou auala.

FOFOGA FETALAI: Atonu o lena ua faafogafoga le sui usufono i le fautuaga a le Palemia, ae i ai foi le manatu i le puipui i le Matagaluega a o feagai ai ma galuega i le tuuaiga pei e foliga e leai so latou agavaa ma so latou silafia e faatino ai galuega, ae taua....

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

Se i tulai mai le Afioga i le Minisita mo Galuega, Felauaiga ma Atinae Eeseese.

Susuga Hon Papaliitele Niko Lee Hang: Lau Afioga i le Fofoga Fetalai, e le fia faalavelavea le taimi taua o le Afioga i le sui usufono mamalu, ona e taua tele le mataupu lea e laga mai e le Afioga i le sui usufono mo Salega Sasae. O le tulaga lea pei ona saunoa le Afioga i le Palemia, e le na o Samoa o aafia i tulaga ia. A o le mea moni lava lau Afioga i le sui usufono mamalu, o auala ia pei ona taua e le Afioga i le Palemia, o le tele o tatou auala e tai 10 tausaga, 20 tausaga le matutua, ae na pau lava le mea lea e mafai i tatou tupe ia e mafai ona faatino ai le galuega, o le fonofono o tatou auala. Ae i ai tapenaga lea e i ai o le a siaki uma auala a le Malo, vaai auala ia ua fai si matutua pe a o i ai ni records, ona tapena loa lea e tatau ona toe faafou uma auala ia. Ae o le tulaga moni lava, a le asphalt ina tatou auala pei o auala ia na saunoa i ai le Afioga i le Palemia i le tatou foleni foi lele, na o le pau lava lena o le tulaga e tai 10 i le 20 tausaga o lelei lava tatou auala. Paga lea e leai ni tatou tupe e fai ai lea tulaga. O lea la e fai le tulaga lea o le basecourse, ae faafetai o lea ua maua le konesale o matou galuega, o le a amia le Afioga i le sui usufono e alu atu e faa-konesale i le faiga o matou galuega fai auala. Ae faafetai e i ai se tagata e malamalama e iloa feaveai le fuavai, fuakoso ma so o se ituaiga fua, e fua ai le lelei o le auala. A o lea ua maua i i le konesale. Faafetai.

Ma lou faaaloalo lava.

Tofa OLO FITI AFOA VAAI: Ia, faafetai ua malamalama lava le vaega lea. Ae o le a taatia la le isi au fua o le a ou le talanoa i ai, ae o le a ou talanoa atu pea i le mea lea, leaga e ala ona mafua le avatu pea avatu pea a matou fautuaga, ona o mea nei o auala, o auala ia e matua tele lava tupe a le tatou atunuu e alu ai, o le tatou paketi uma lava i tausaga uma lava. O le mea foi lena e avatu ai lau fautuaga ma avatu nai metotia e foefoe ai le lua galuega ma le Sui Minisita. Faafetai atu, o le tele o taimi ou te vaai ai e alu a lua asiasiga i Savaii, o tua, malo faafetai. Ae pau lava le mea lena e misa, o lena e misa lua fua, e te lua o ma ave lua fua. Ou te fautuaina lau Afioga, a lua toe asiasi, o ma ave lua fua ia e lua, aua e te lua maua lelei ai lava ia konekarate e le o faamaoni i le faiga o latou galuega.

FOFOGA FETALAI: Ou te....

Tofa OLO FITI AFOA VAAI: O lea ou te fai atu, e fua i le fuakoso le mafiafia o layers ia ou te fai atu ai. Aua o le mea foi, tasi lena mea, a maua atu foi ouluga e le atunuu o fai ma tatoso solo mai lua fua na i luga o le auala, e fua atu lea pu ma lea...e iloa ai le lua faamaoni i le faatinoga o le lua galuega. E pei o lau lena fautuaga.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

A o le isi vaega lau Afioga i le Fofoga Fetalai, ona ou oo mai lea i le falepuipui. O le upu nmni lau Afioga i le Fofoga Fetalai, e le seetia le itumalo lenei i se faamalamalama na aumai, ona o le tulaga na tupu muamua foi, o lea foi ua toe tulai mai. Ou te fia fesili atu lava i le Afioga i le Minisita o Tupe, masalo aua ou te talitonu o ia foi o le Taitaifono o le Tenders Board, e faapena foi le Afioga i le Minisita mo Galuega o ia o le Sui Taitaifono. O lau maitau atu i tupe ia ua faaalu i le falepuipui o lea ua oo i le \$10.3miliona. Ua \$3miliona lea ua ova ai nei le Tender lea e \$7.4miliona. O le ata foi la lea o lea ou te vaai atu i le faasologa o isi galuega pe afai e \$20miliona e faauma ai le galuega, o lea ua aumai i i le ata faataitai o le \$3miliona lea e le i faia i ai se Tauofoga. Ou te fia fesili foi pe o se faaiuga lea a lua Afioga na fai i le Tauofoga lea na fai muamua e tusa ai ma faiga faavae ma Tulafono a lo tatou Malo i mea ia o Procurement Guidelines Treasury Instructions, ia mea foi ia o le P4 Schedules ea lea e matua mai oio ai vaega e ao ona faia i ai tauofoga. I lau tau maitau atu i le tou Tenders Board, a faapea e \$10,000 agai i luga i le \$50,000 ua matua fai faamalosi le Tender, ae a oo loa i tai miliona, ua pei e fai faatogafiti le faiga o mea nei, o variations mea nei, e sao lava le saunoaga a le isi sui usufono, o variations mea e aumai i totonu i i.

FOFOGA FETALAI: Se i tulai mai le Minisita o Tupe.

Afioga Hon Sili Epa Tuioti (Minisita o Tupe): O le mea e fia faasao lau Afioga i le Fofoga Fetalai. E tali atu i le faafesili, o le taimi lenei e leai se variation ua faia, e leai se variation ua talosaga mai i ai ia le Matagaluega. O le tulaga foi o le Tender lea na fai pei ona taua, e \$10miliona, a o le fuafuaga a le Ofisa o Tupe, aua ne i ave le tupe atoa lea i le taimi e tasi, o lea na ala ai i le tatou Tala Autu o le Tupe lea na ave ai le \$3.7miliona, ona o le tulaga ina ia fai fuafua le faaaogaina atu ma le tuuina atu o le tupe i le faatinoga o le galuega a latou o lo o i le contractor, o lea la ua toe... mai le faasologa o le galuega, e toe manaomia se isi vaegatupe e tuu atu o lea ua i ai le \$3.7miliona i le Supplementary. O lo o i ai le faamoemoe i le Main Estimates o le tausaga lea, o le a faapena ona avatu ai le isi vaega e atoa i ai le tupe lea na fai i ai ia Tauofoga lea ua malo ai le Contract o i ai nei. E fia faamalamalama atu foi, o lo o i ai ia le kamupani le Project Manager, e independent mai i le Tenders Board, e independent mai le Konekarate, o lo o i ai le Kamupani lea a le OSM Consult, o latou na o lo o galulue i le tulaga ia faamautinoa o lo o mulimulitai ia le Contractor i le tulaga i le faatupeina ma le tulaga o le galuega lea na fai i ai le Tauofoga ma ua uma ona avatu i ai ma faapepaina.

E pei ona saunoa le Afioga i le Minisita mo Falepuipui ma Auaunaga Toefuataina i le \$20miliona, o le tau lena o isi galuega ia e le i faasolo le tender ina, pei o le faiga o le pa, faiga o le auala ma le suavai lea ua faasolo ona faagaioi, a o le tulaga ia o lo o i ai, e le i fautuaina mai e le Konesale o lo o vaavaaia le galuega, e le i talosaga mai foi ia le Contractor i se variation.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

Ma o le taimi lenei e le o i ai foi se fuafuaga e fai se variation o lea ua lava le \$3.7miliona lea e faauma ia le galuega lea ua faamuamua le phase one o le atinae.

Ma le faaaloalo lava.

FOFOGA FETALAI: Malo atonu ua manino lea tulaga. Ae i ai le mea ou te fia fautua atu i le sui usufono mamalu o lo o saunoa le sui usufono mo Salega Sasae. O le sui usufono foi ua fai sina leva i le Maota, ae ou te fautua atu i lou taimi o le Fofoga Fetalai, ou te le toe fia faafofoga i le gagana lea sa e faaaogaina nei. E fautua atu o le tatou fonon o tatou o Taitai o le atunuu, tatou te le saunoa ma fetalai i ni saunoaga foi ia tuulafoai. O lo o faafofoga tapuai Samoa ma o lo o faapena ona alu i tua le tatou fonotaga ma le faasalalauga, ae saunoa mai i le gagana e faigofie ona faamatala ai ia lou finagalo. Ae ou te teena ma ou te le fiafia i le gagana lea sa e faaaogaina, ui o lea, sa ou musu e vave pai atu i lou finagalo, ina ne i fale le matega i le maitau mau a le fanau. Ae mo le gagana e faaaogaina i totonu o le tatou Palemene, aua ne i faaataatalafoga finagalo, leaga e malu afepea ae tiga ai taliga o le atunuu. O lea ua ou fai atu, i lou taimi o le Fofoga Fetalai, aua ne i ou toe faalogo i se upu faapea leaga o la e lavea i a tatou Tulafono Tumau le gagana e tatou te faaaogaina i a tatou felafolafoaiga.

O le mea la lea ou te faamalulu atu ai e le faapitoa foi manu ia Tasi, ae mo le tausiga o le mamalu ma le faafofoga tapuai mai a Samoa, e le gata i Le Ao Mamalu, i Aiga ma Tama, o Tama ma Aiga, ae faapea foi i le Aufaitatalo o alo ma fanau, e faapena se lagona.

Tulai mai le sui usufono e faaauau le saunoaga.

Tofa OLO FITI AFOA VAAI: E faafetai atu i lau Afioga i le Fofoga Fetalai, o au lea e tau tomanatu po o le a se tulaga faaletonu o sa matou tala. I le tagata lava ia sa manino lava le avatuga foi o so matou lagona, ae faamalulu atu i lau Afioga pe a faapea o se finagalo lena o lau Afioga ua faaletonu se upu, a o lea sa faamanino i le gagana faigofie le auala e fai ai so matou manatu. O le mea lea e faamalulu atu i lau Afioga ma le faafofoga foi a le atunuu pe a faapea ua i ai se sala, ae talitonu lava le vaivaiga o lenei sui usufono lau Afioga, e le i ai ni tulaga faauigalua po o se tulaga faapena o sa matou tala, sa avatu lava i le tulaga manino ma le faigofie.

Ae lau Afioga i le Fofoga Fetalai, o lea ua manino le saunoaga a le Afioga i le Minisita i le tulaga o le Tauofoina o galuega. O lea foi ua ou faalogologo atu e i ai phases e faia ai le galuega lenei. O lau la faafesili atu i le Afioga i le Minisita, pe eseese phases ae tumau lava le Konekarate e tasi? Pe o le a sui foi ni Konekarate? Aua a i ai foi suiga o Konekarate, o lona uiga e nunumi solo i le faiga o le galuega. A o lea ou te tau maua, o la lava na manino lava le finagalo o le Afioga i le Minisita mo Falepuipui ma Auaunaga Tōefuataina, o le galuega e auauai atu seleni e fai ai, o lona uiga, e tumau le Konekarate e tasi e latou te faatino le galuega.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

Pei o le ala lena na avatu ai se manatu i le tulaga o le faafoega o le galuega, aua o lea la o le a avatu le matou faatuatuaga i lau Afioga i le tulaga o le faiga o le Taufoga, pe afai o lena lou finagalo, aua o lea matou te tilotilo, pe o le Konekarate lava lena e tasi lea o le a faia le tatou galuega?

Ona ou oo mai laia i le Ofisa o Faatoaga. Lau Afioga Minisita, ia e i ai tulaga ia i tai i le tatou galuega foi lele o le Quarantine. O le upu moni lava lau Afioga i le Fofoga Fetalai, e ese lo ta masiasi i le tulaga foi lele o le faiga o le service, o lea ua sii ia tulaga o service fees, ae a tatou oo atu i tai pe tou te afifio atu foi i tai e faaasu ia tatou ietoga, vaeatu le paia o le Maota, e toe tuli ta ita e toe aumai sata tape ma sata mortein e fai ai mea ia. E na ona ou faapena atu lau Afioga i le Minisita, o mea uma ia sa tatau ona provide e le tou Ministry, mea faapena o spray pe afai ua spray, a o lau tilotilo pei ua toe foi i tua lo tatou atunuu i le faiga o na mea, ua leva ona tatau ona i ai ni masini foi ia e alu atu i o ia faaalua ai faaasu faalelei. E i ai foi lava isi Matagaluega e faapena a o atu ae toe tutuli e o e aumai ni mea e faatino ai le galuega. Na o le talosaga atu lava i lau Afioga, se i silasila ifo i le tulaga lena i le faaleleia atili o le auaunaga ia ma tulai mai o se auaunaga e professional le faatinoga.

O le matou lauga lena lau Afioga i le Fofoga Fetalai, afai foi ua tai aluga foi le ia a Samoaleoi ma le Alataua i lenei taeao, ia e faamalulu atu. O naunauga lava ma moomooga i le fia fai mea lelei, ae leaga e fai lava sina ogaoga o mataupu ia e tulai mai i le tatou atunuu i le tulaga o mea nei i le faaogaina o tupe. Ia a faapea foi ua paopapa se leo i lau faafofoga, e moni ai lau saunoaga e fai soo, e le o se finagalo lena o Salega, afai foi na fai atu se tala ma pei e totoe sui usufono mamalu o le Maota nei, ia o latou lava finagalo e faaliliu ai e latou ia le sao ma le sese ma le itu lelei ma le itu faaletonu. Ae sa avatu manino lava le matou vaivaiga, e tusa ma mataupu o lo o aumaia i totonu o le tatou Tala o le Tupe.

O le matou tala lea ia manuia le Fonousu a Samoa, manuia foi le tapuaiga a lo tatou atunuu, ma le faaaloalo faafetai.

FOFOGA FETALAI: Malo faafetai, faafetai i le saunoaga a le sui usufono mamalu. Ma ua avanoa foi le Laulau a le Palemene mo se tasi o sui usufono e saunoa ma malele e tusa ai o le tatou mataupu.

Tulai maia le sui usufono mo Lefaga ma Faleaseela.

Afioga TOLEAFOA KEN VAAFUSUAGA POUTOA (Lefaga & Faleaseela): E muamua ona momoli atu le agaga faafetai ma le agaga faamalo i lau Afioga i le Fofoga Fetalai mo le avanoa o lenei itumalo, ua maea foi ona e momoli lapalapa o Malo ma e sula le alofa ma le agalelei o le Atua, aua le Fonousu a Samoa i lenei taeao. E faatalofa atu foi i lau Afioga i le Taitai o le Malo lau Afioga i le Palemia ma le Kapeneta, aemaise lau Afioga i le Fofoga Fetalai ma le mamalu o le Palemene, le tapuaiga a Faauluuluga o Matagaluega o lo o vae ma lima i ai le Malo aua le faatinoina o le galuega ma auauna aua se manuia o Samoa mo nei ma a taeao.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

Ae ua ou tulai ma le agaga faaaloalo i leni taeao, e fia faaali foi se finagalo o leni itumalo e tusa ai ma le Tulafono Tau Faaofi o le Faatatauina o Tupe Faaopoopo (Nu.1) 2017/2018. E maitau atu i le Tala Faaopoopo o le Tupe e \$24.4miliona le tupe lea ua toe faaopoopo aua le faaauauina o galuega lelei a le Malo aua le faatinoina i nuu ma afioaga, aemaise o totonu o le tatou atunuu. E lagolagoina ma le agaga faaaloalo e leni itumalo le Tala Faaopoopo o le Tupe, e pei ona silafia e lau Afioga i le Taitai o le Malo ma le Kapeneta, ia o lena e i ina le talosaga a leni itumalo ona o mea e fia faaleleia i totonu o leni itumalo. O le agaga lena o leni itumalo e lagolagoina leni Tulafono Tau Faaofi o le Faatatauina o Tupe Faaopoopo (Nu.1) 2017/2018 aua lau faasoa aua mea e fia faaleleia o leni itumalo ua uma ona...masalo ua lua Tala o le Tupe o lauga ai leni itumalo, o le agaga lena. E talosaga atu pea e faaauau galuega lelei, aua se manuia i totonu o leni itumalo.

E faamanatu atu foi i lau Afioga i le Minisita mo le Soifua Maloloina, o lena e i ina le ta talosaga aua lava se falemai o leni itumalo po o auuanga faasoifua maloloina, ina ia faaauau pea i totonu o leni itumalo, ma le agaga faaaloalo. E avea foi leni itula e momoli atu ai le agaga faafetai i lau Afioga i le Minisita mo le Soifua Maloloina, ona o le fesoasoani foi i se tasi o leni itumalo na sulu atu ai i lau Afioga mo se fesoasoani, ia e momoli atu le agaga faafetai i lau Afioga i le Minisita mo le vave ona tali mai, leaga o le soifua ma le ola o le tagata, e leai se togafiti a se isi e toe fai i ai i tulaga faapenei, a oo loa ina luga ma tiga ia le soifua o le tagata, e manaomia le vave ona faatinoina le auunaga. O lea e momoli atu ai le agaga faafetai i lau Afioga i le Minisita mo le Soifua Maloloina, ona o le fesoasoani mai i le taimi foi na sulufai atu ai e fia maua se fesoasoani a le Matagaluega ma lau Afioga.

Ona ou oo mai lea i le Matagaluega o Faatoaga ma Faigafaiva, e momoli foi le agaga faafetai i le sa avea ma Minisita mo Faatoaga ma Faigafaiva talu ai. E pei lava ona silafia leni itumalo e le tau faailoaina, o lo o galulue pea ma tautua e toto le vao aua le fofoga taumafa o le atunuu aemaise o le faamoemoe o le Malo, e uunai tatou container ia e momoli atu i atunuu i fafo e fesoasoani aua le tamaoiga o Samoa. E momoli atu ai le agaga faafetai i le Afioga i le Minisita sa tauaveina lea Matagaluega i taimi talu ai, ona sa tatou galulue faatasi ma nisi foi o tamalii o leni itumalo ma leni afioaga aua le taumafaiga o ia tulaga.

Faafetai foi i lau Afioga i le Minisita ua tulai mai i leni taimi, o lea ua foi mai le ta asiasiga, o lena ua e mautinoa, ia o le auala lena o lo o tele ai le talo i leni afioaga, o lena ua e silasila i ai ma e tagatagai i ai, e lafo atu. E pei ona ou fai atu, e le i fausia Roma i se aso e tasi, ae o le a faamoemoe atu i lau Afioga ma lau faasoa aua galuega fai a le Matagaluega ona o lou uunaia mai o le tatou talo ina ia toto le talo, aua le auina atu i Niu Sila ma Ausetalia ma isi atunuu, aua le uunaia o tatou export ia lava le tatou export e ave i fafo.

Ona ou oo mai lea i lau Afioga i le Minisita mo Galuega, Felauaiga ma Atinae Esee. Masalo ua paopapa lava i leni taeao nisi o saunoaga foi e tusa ai i tatou auala.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

Na o se tuualalo foi i lau Afioga, e le aoaia foi e le Matapia le Manaia, o lena e i ina le tofa ma le faautaga, o le a le mea e le fai ai sina au polokalame foi lea o auala, e tai lua tausaga ma toe faata o tatou auala, ae tatou o ese ia ma lea mea o le maintenance ea po o le a ea o le tanutanu tanutanu, a faaputu na seleni, e tasi lava le faata ae maea lelei ma lelei o tatou auala. E talosaga atu ai i lau Afioga i le Minisita mo Galuega, Felauaiga ma Atinae Eseeese, ia ma se i e silasila ane pea i ta auala na, na ta feiloai ma e saunoa mai o le a fai, ia ua maea le Kerisimasi ma le Tausaga Fou, e le i faatinoina lava se mea. Ae faamoemoe i lau Afioga mo galuega lelei aua le manuia o Samoa mo nei ma a taeao.

Ona faaii lea o sa matou tala ma le agaga faaaloalo i lenei taeao, e matua lagolagoina e lenei itumalo le Tulafono Tau Faaofi o le Faatatauina o Tupe Faaopoopo (Nu.1) 2017/2018. Ae le i faaiuina se faamatalaga ma le agaga faaaloalo, e fia faapai atu i le tapuaiga a si ou itumalo, le paia ia Satuala ma le latou Tama Tuisavailuu, le Afio o le Matua ia Satuala, Afio le Taulagi, ma le mamalu ia te oe le Faleaana, aemaise le Aufaigaluega Totofi a le Atua, o lo o nono manu ma folafolaina le upu, aua se manuia o lenei itumalo.

Malo faafetai malo tapuai, lagona le mafanafana o le sui, ona o la outou tapuaiga o lo o tatou feiloai pea i lea aso ma lea aso ma tatou mafuta pea. Ia o le matou tala o le a foi, ia alofagia lau Afioga i le Fofoga Fetalai, maua lou malosi i le tino, sili i la le agaga. Alofagia lau Afioga i le Palemia ma le Kapeneta, ia alo i outou faiva o lenei tausaga fou, feau ma galuega ma lau faasoa, ia manatua ane lenei itumalo ma le agaga faaaloalo. Manuia le tatou Fono, soifua.

FOFOGA FETALAI: Malo, faafetai, faafetai i le saunoaga i le sui mamalu o Lefaga ma Faleaseela faapea foi le itumalo. Ia sosoo ma le tulai mai o se isi sui e saunoa. E maitau atu ua tulai mai le sui usufono mo Vaimauga Sasae.

Afioga SULAMANAIA FETAIAI TAUILILI TUIVASA (Vaimauga Sasae): Faafetai i lau Afioga i le Fofoga Fetalai, lenei taeao ma le Fono usu a le atunuu. Ia a o le i faia se manatu e tusa ai ma le Tala Faaopoopo o le Tupe, e muamua ona ou faatalofa atu i le Maota i le afio a lau Afioga i le Taitai o le Malo, lau Afioga i le Palemia, ia aemaise foi le Afioga i le Sui Palemia, ia aemaise o le paia i le Kapeneta, afifio foi o Minisita Lagolago, ia aemaise foi o le afifio o Afioga i alii ma tamaitai sui usufono o le Palemene o Samoa. Ia ou te fia faatalofa foi i le tapuaiga a le atunuu i le afio O Lana Afioga Mamalu O Le Ao Mamalu o le Malo le Afioga i le Tuiaana Tuimalealiifano aemaise o le Masiofo, ia aemaise foi o Sui o Fono a Sui Tofia ma o latou Faletua, ia aemaise foi o le tapuaiga a si ou itumalo pele o Vaimauga Sasae o lo o tapuaia lenei Fonotaga, tapuai maia ma le manuia.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

E momoli lau faafetai ma le faamalo i le Tala Faatatau o le Tupe o lo o opea nei i le Maota. E pei ona maua i le Tala Autu o le Tupe i le tausaga ua mavae, sa leai lava se manatu o lenei itumalo o Vaimauga Sasae e faaalua se manatu i mataupu taitasi sa aumai i le Tala o le Tupe, ona sa ou iloa ma ou mautinoa le l lava o le faasoa ma le tamaoaga o le tatou atunuu e faatino ai fuafuaga uma lava e manaomia e le Malo. Pau lava le mea sa talanoa i ai le sui o Vaimauga Sasae o le tulaga lea na aumai i tax mo nai faifeau, pau lava lena sa ou talanoa i ai. A o le tulaga i le aotelega o le Tala o le Tupe na faataatia mai i le Fonotaga ua tuanai ma o lea ua toe aumai lona toe faaopoopoga, sa talia ma le agaga faafetai. O lea foi la ua maua i lenei taeao nisi foi o saunoaga a nisi o sui a usufono ua mautinoa ai foi nisi o ekalesia ua faapena foi ona solitu i le fuafuaga a le tatou Malo, ia o le naunautaiga lena o le sui usufono ma lou popolega lea. Afai o totonu o fonotaga a alii ma faipule o lo o malu ai si o tatou atunuu, e ala foi i totonu o ekalesia, ia e tatau lava ona lagolagosua i mea ua pasia atu e le Fonotaga tele lenei a le Malo.

Sa faafofoga uma lava tatou o sui a usufono i le aumaiga i totonu o le Tala o le Tupe, pau lava lea o le sui usufono sa tetee ai, ae lea ua maua ua toe tetee ni isi o sui usufono, e lagona ai le faanoanoa le sui usufono o Vaimauga. O le Tala o le Tupe, matuai lagolagoina le Tala Faaopopo, ona e le o lava ni oa ma ni sosia a le tatou atunuu e faatino ai mea e fai. Ae o le tulaga i le manatu autu o le sui usufono o Vaimauga, pau lava le lape lea e i ai, o le faatinoga o le auunaga. O lea foi e tele lava ni finagalo e ave i le mataupu lea i le falepuipui. Ia sala foi ina tele, ia o lea e maua e le o po se lilo i le talanoa a le atunuu, o lea e maua e tuuaina fua le Board lea e faia le Tender, ia a o mea uma lava e tatau ona, e tatou te faateete tatou ia o Minisita ma e o lo o i totonu o le Malo, i le vaai mai o le atunuu i le tuuaina o tatou. O ai e muamua tuuaia? E tuuaia le Afioga i le Palemia ma lana Sui Palemia o laua ia o tama Atua ma le teine Atua o laua ia o lo o taitaia le sa o Samoa. A lea e maua foi i lenei taeao o lea e malamalama lelei i fuainumera ia le sui o Vaimauga Sasae, o le mea lena e le tau faaali ai ni manatu i mea o lau matafaioi lea.

O lenei taeao ma le faalogologo, e tuuaia ia o lea foi e afio mai le Loia Sili, pe a faapea o le faatinoga o mea ia o Tenders. A vaai atu o i ai ni fesootaiga i vaega ia, ia e tatau lava ona soalaupule mea ia, aua ne i faatinoina, aua o lea e tuuaia ai le tatou Faigamalo, o ai? O tatou uma lava lea e i ai, ia a o le vaai....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai....

FOFOGA FETALAI: Malie le sui usufono, se i tulai mai le Palemia.

Susuga Hon Tuilaepa Auelua Fatialofa Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o si mea sia e fia faamalamalama.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

Se aua e te popole i faitioga e lafo mai i le Malo, leaga e le mafai ona faamalalameina uma tagata uma. O lea foi e te silafia e tiga ona faamalalalama atu e le Malo, ae i ai lava e e le fia malamalama, o le latou aia tatau lena. Ae e le mafai lava ona fefe le Malo e faamalalalama ia mea e tatau ona faamalalalama. E faapena le soifuaga lea tatou te i ai, e le o augata foi le Malo e faamalalalama mea ia. Aua o le tulaga ia i le mea o le faitio, e te fiu e faamalalame le tagata e faitio lava latou. O le mea la lea, aua e te popole. O le tulaga foi o lea e taumafai e faamatala atu, e leai ni mea piopio o faia. O le uiga lava lena o tagata ma o latou finagalo, ae leai lava ni mea piopio o faia i i le tulaga o le falepuipui.

A o le mea lea e taumafai i ai, e pei lava ona avatu soo i faamatalaga, e le tatau ona faaauu pea le falepuipui lea i i. E tatau ona aveese mamao atu i se mea e le tatau ona o i i le mea lea, ua oo atu i ai le taulaga. Ma e le tatau le tatau ona lotolotoi ai le falepuipui i le mea o lea ua tumutumu i ai tagata. E tatau ona ave mamao, o le mea lena e tatau ona fai, ma o mea e te fefe e fai ona o le tau, e toe asiasi mai lava ae sau mulimuli, ua taugata. Afai loa o le mea ua tatau ona fai fai loa.

O le taimi lenei, o le matua tele lava o faafitauli lea e faafeagai, ia e le gata o le Management, ae tuu ane foi i ai ma le faalepuipui ua tuai foi le faalepuipui ia. E faafia ea ona faitioina tatou? O lea ua tatou i ai i le taimi o mea uma tatou te fai, e omai tagata ma tilotilo i ai, tilotilo i ai, ua tatou le toe o i le faiga tuai. O le pagota o le pagota, e le toe taua o se tagata soifua e tatau ona fai i ai ia ni faiga faatagata soifua. Ua uma aso la, a o aso la nei, o lea ua V-Sight tatou e Malo uma i fafo, po o faapefea ona tatou faia ia lea vaega o le atunuu, po o fai faamanu po o fai faatagata soifua, o le ala lena lea ua sui ai le igoa, o le Toefuataina, ma ua sui atoa ai ma faiga faavae, ua taumafai le Malo e fai ni polokalame, ia omai tagata nei fafo, ae le toe o e toe fai ni meavalea sa latou faia ma salamo moni ai, o le mea lena lea ua agai i ai. E foliga la e taugata, aua tatou te alo i le mea e tatau ona fai.

Lau Afioa i le Fofoga Fetalai, o le tulaga lena, lea sa omai foi isi tagata mai fafo ma talanoa mai i le sola soo, sola soo, sola soo, o ituaiga faafitauli na lea e faafeagai ma le Malo i le taimi lenei. Ma o faiga ia e fai i inei, i le matua faamalasia o le falepuipui, ia aua ai ne i toe tupu mea ia, leaga ua tuai, ova le 100 tausaga le tele o fale o le nofoaga la lea ua faigofie ona talepe mai totonu. O le ala lena o lea e ala ai ona tatou taumafai e fai mea mautu mo le lumanai. Po o le a le faigata i le taimi lenei, ae tatou te toe aeaie ai ona ua le o toe taofiofia i lalo i le 50 pagota sa masani ona i ai, ua ova ma le 200 ova ma le 300. Ma e tupu pea le mea lea o le mariuana, tupu pea, o le mea la lena o lea e fesuisui ai faiga faavae a le tatou Malo ina ia mafai ona polapui i le tatou atunuu e le gata i le puipuia lelei, ae fai ni polokalame e sui atoa ai ia le mindset o latou ua solitulafono. Ia foi mai i totonu o le falepuipui ua avea ma tagata ua toefuataina, ua sui atoa le soifua.

Lau Afioa i le Fofoga Fetalai, o le fesoasoani atu lena i le mataupu.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

FOFOGA FETALAI: Malo faafetai.

Susuga Laauli Polataivao Leautea: Lau Afioga i le Fofoga Fetalai....

FOFOGA FETALAI: Malie se i tulai mai le sui o Gagaifomauga Nu.3.

Susuga Laauli Leautea Polataivao Fossie Schmidt: Lau Afioga i le Fofoga Fetalai, o sina mea laitiiti lava e fia faamalamalama lau Afioga, ina ne i le manino le saunoaga a lenei itumalo ma le mea ua oo i ai ia le saunoaga a le fale Vaimauga, ia ona maitau mai lea o le atunuu. O le aano o le mataupu na ou avatua, o le tuualalo i le Malo. O le Tulafono ua pasi, e leai se mea e mafai ona toe fai i ai ua pasi. A o le mea ua tulai mai i le fesopoai o le puleao ma le pulepo, o le ala lea o le tatalo atu. O le ala lena o le taumafai atu lau Afioga i le Fofoga Fetalai, e le o pasia i le Faavae a le Ekalesia na ala ai ona ou tatalo atu a o lea ua i ai le Tulafono. Ou te le toe teena la le Tulafono, o le tatalo i le Malo, faatuaituai, se i fai le fono i Malua, ona aumai lea o le iuga a le ekalesia.

FOFOGA FETALAI: Tulai mai le Palemia.

Susuga Hon Tuilaepa Auelua Fatialofa Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, aumai le tusi a le Failautusi, e toe faatuaituai, o lau tali i le Failautusi, o le tiute lena a oe, e te faamalamalama, ua uma ona fai le faatuaituai. O lea na pasi ia luni, ae tolopo se i amata i le tausaga fou, lea la ua tatou i ai. Ona ou logoina lea o le Failautusi, toe masina ma aso ia e totoe o le faatuaituai, ia ona uma loa lea o le faatuaituai. Ua uma la ona tatou asaina ia le faatuaituai lena, ae lea foi ua toe fai ifo i le Failautusi o oe sa e Polofesa i le Iunivesite le tatou National NUS. Nofu oe ma faamatala i toeaia, ae le o le fai mai lava o toeaia ona e alu pogisa lava lea, a o oe o le tagata aoaoina i le potu faaneionapo. Lau Afioga i le Fofoga Fetalai, ua uma le faatuaituai.

FOFOGA FETALAI: Malo faafetai. Ia, ma o lenei mataupu o le mataupu ua manino auofala, ua tele foi aso o faapena ona malele ma saunoa i ai, e le gata i le Minisita e ana le Tulafono e pei ona tuuina mai i luma o le Palemene, ae faapena foi i le faamalamalamaina e le Afioga i le Palemia. Ma o le mafuaaga foi lena na pasia ai lena mataupu. E pei lava foi ona matou avatua, e tasi lava le sui usufono sa faapea ona tulai mai lea sa i ai le sui usufono mo Vaimauga i Sasae. Ia, o le ala foi lena, malie le sui usufono mamalu, o le ala lena na matou fesoasoani atu ai, na ona toe faamanatu atu, o le ogasamai sa tatou asa mai ai. E ui i lea, e leai, e faapena. Ou te faamanatu atu foi, aua o le tiute lea o le Fofoga Fetalai, o le faamanatu atu o lo tatou tiute faafaipule ma le faatautoina o i tatou ma a tatou Tulafono Tumau. Ioe.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

Ia ona faapena lea ona fetuutuunai e tatou, ave foi le tatou galuega i nai tatou Ekalesia ma tulaga faapena. Aua e fai foi o lena, o lenei foi, ta te le fia avatua foi i luma le tulaga pei ona i ai le va o le Fofoga Fetalai, ua leva ona ou Tiakono Toeaina o Malua. Ou te le fia avatua mea ia leaga ou te musu e aliali i luma, ae teu lava i le loto leaga o le tatou galuega ma le tatou pitolaau. E fetuutuunai mea ia e lua ona galulue faatasi lea e manuia ai Samoa.

Ia o le matou fesoasoani lea. Tulai mai le sui usufono e faaauau le saunoaga.

Afioga SULAMANAIA FETAIAI TAUILILI TUIVASA: Ou te faafetai i le Afioga i le Fofoga Fetalai. Ou te le tuuaia foi se manatu e faaali i le tulaga lea, e pau lava lena o se popole lea e i ai, e pei ona malele foi le tama o le atunuu o faiga faavae o lo o fai ai le tulaga lea i tenders ma mea faapena. O lea foi la e maua i lenei taeao e taumafai lava si toeaina e puipui nai ana Minisita. O le mea lea e i ai e tele saunoaga a le atunuu ma faasea ona o faiga faavae o lo o alu i ai mea nei o tenders. Ae maitau, o le Afioga i le Palemia ma lana Minisita Lagolago, o lauá .

FOFOGA FETALAI: Malie le sui usufono mo Vaimauga Sasae, se i toe tulai atu le faamalamalama a le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai o se mea e fia faasao. E ala ona ou tulai atu ona o faiga faavae a le tatou Malo, ae ou te le o tulai atu ona o le puipui o se Minisita. E leai, o lea ou te tulai atu e puipui faiga faavae a le tatou Malo. E fai loa faiga faavae, o i ina tatou te mulimuli ai.

FOFOGA FETALAI: Ia, se íí Atonu o lea ua manino tulaga ia aua e faapena lava uiga o le soifuaga e tainane lava a o lo o faapena ona faagasolo galuega, e le gata i Matagaluega a le Malo a o faalapopotoga e ala i faiga faavae e faagasolo ai lea mea ma lea mea, ae i ai lava le mea e faapena ona kiliva sese i tua ma maua ai foi e sui usufono mamalu o le Palemene se le fia talitunuina o a tatou galuega. Ae ui i lea, e pei lava o le faataoto lea e saunoa soo i ai le Palemia, e tutu faatasi lava le titania ma le saito. Fai mai lea e i ai lava le taimi e seiina ai le titania pe sei muamua foi le saito. E faapena, e na ona faamanatu atu foi i lau Afioga i le sui usufono mamalu, o oe foi o le tagata ua leva ona i le Malo e faapena ona faitioina e le au le malamalama a o lena lava e te silafia le mea o taoto ai faiga faavae a lea Matagaluega ma lea Faalapopotoga. Tulai mai le sui usufono.

Afioga SULAMANAIA FETAIAI TAUILILI TUIVASA: Faafetai. Masalo o le a see ese le sui usufono mo Vaimauga Sasae mai le Tala o le Tupe. E matua lagolagoina lava leí Faafetai i lau Afioga i le Minisita ma le tulaga o le toe aumaiga o lenei Tala o le Tupe.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

E ui lava ina sa saunoa foi le Minisita o Tupe i le tausaga ua tuanai e leai se Supplementary, sa ta ofo ai. Ae manaia foi i lenei taeao, e leai lava se Tala o le Tupe e leai sona atoaga. Ae o le a ou pasia ma ou lagolagoina le Tala Faatatau Faaopopo o le Tupe, ae se i ou oo i si ou itumalo.

O le itumalo lenei o Vaimauga Sasae, masalo o lo o tamaoaiga i mea nei o fanua, o le latou tatalo foi sa tuuina mai i le latou sui usufono, se i alofagia ia e le Afioga i le Palemia ma le Minisita se talosaga lea o lo o opea nei i le Maota lau Afioga i le Fofoga Fetalai, o lena o lo o i ai le tulaga foi o le talosaga a lenei sui e tai \$8,000 i le kuata eka. Ua leva ona faatalitali si ou itumalo se i faamatuu atu ia nei tau ae se i omai e aumai tupe i totonu e fesoasoani i le Malo.

O le tulaga i le Minisita lea o Felauaiga, ou te faafetai lava ona o lea ua ataata mai lou finagalo o le a faatino tatou auala i le itumalo i Vaimauga. Ia, e tatalo atu, ou te le aiaina faiga faavae o lo o faatino ai au auala. Na pau lava le mea o lo o manao i ai le itumalo lenei o Vaimauga Sasae tusa lava pe leai se ta, na o le faalamolemole lava o auala i totonu o lotoifale ma mea e agai i ai, e amata mai i Laulii, Letogo, Vaillele ma Fagalii, ua matuai mafatia lava.

O le tulaga i auala galue o le afioaga lea o Laulii, a outou silasila i le afioaga lea, e lumafale i moana ae tuafale i le papa, na ona alu atu lava, mauga loa. Talu ona tulai mai nei faigamalo ma tutoatasi o tatou, e le o i ai ma se auala galue o mafai ona suaina i luga o mauga nei se i tulou, e le gata e o e galulue ai ae sosola i ai foi i le Tsunami. E tatalo atu i lau Afioga i le Minisita se i alofagia auala galue o le afioaga lea o Laulii e agai ai i luga. A outou silasila foi i totonu o le maketi lea i Fugalei se i tulou, o le toatele o tagata faatau mea vela la e i ai fai faleaiga, o tagata o lou nuu lea o Laulii. O le tele ia o fua o faaeleeleaga i luga o mauga, ae amo mai lava. Ona o le a? E le mafai ona sao ai ni auala. E oo foi i fanua maliu sa lagomau ai e ua tofafa mai tiasa i le afioaga lea o Laulii e le o mafai ona oo i ai ni taavale se i tulou ona o le leaga o le auala. E amo lava nai o matou tagata i luga, e tatalo atu ai i lea vaega.

Lau Afioga i le Minisita o le MNRE, masalo o oe e te afio mai Atua, o lau Afioga foi i le Sao Faapito, se i silasila ifo pe a e agai atu i tua lua Afioga ma le Palemia, e te muamua oo atu i Laulii ia ua matua malepe lava le taligalu ua sau le aia, ona o Laulii e leai sona ava foi leaí oi se aau, o le moana atoa. O lea foi sa ou tatalo atu ai, ua tuai le uafu i Vaiusu ae ua vave mai Laulii, ona o le moana atoa lava le mea lea, e faigofie na o le o atu lava o vaa faatino ai loa ma taula ai. Se i silasila ifo i le taligalu o lou afioaga lea o Laulii.

O le tulaga i si ou nuu o Letogo, e tatalo atu lava i matou fanua ia lea sa faamatuu atu e le Malo, ia o lo o taliga lava nai o matou nuu, o Letogo, Vailele ma Fagalii i nei fanua.

Ia o le tatalo foi i le tulaga lea i le Minisita mo Falepuipui lea ua tulai mai ai lau Afioga i le Palemia, e le i tulai mai lau Afioga ae sa ioe mai le Minisita muamua o le a faatino se falepuipui i Vaileleuta i le mea e i ai le reserve a le Malo.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

Ae masalo la e le i tuina atu e le Minisita muamua le faila lea sa pasia ai le falepuipui i uta i le reserve lea, ona e le o po se lilo o tuamaota o lou nuu lea o Vailele maí o lo o i ai le mamalu o le atunuu o lo o faatau ai o latou lava fanua saoloto. O le popolega lena o nai tagata i le pulega, ua laki lava o le lelei o lau faafoega foi o afioaga ia o Vailele ma Letogo o le pule mamalu a alii ma faipule o lo o malu ai nai tagata ia. O lea la e tatalo atu ai i le Afioga i le Minisita o i ai nei le Afioga i le Palemia i le falepuipui lea sa ioe i ai Sala ae ua fai loa fesuiaiga ua leiloa atu ai ma le faila. Se i toe faatino ifo lea fuafuaga.

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ou te faafesili atu lava, o se falepuipui faapitoa mo Laulii po o Letogo?

Afioga SULAMANAIA FETAIAI TAUILIILI TUIVASA: Lau Afioga faamolemole e fia faasao atu lava, e le o se falepuipui o le Ofisa o Leoleo. O le Ofisa e tuu ai leoleo e vaaia lea foi vaega o le atunuu. Faamolemole e faasao atu e le o se falepuipui o le Ofisa o Leoleo e faatino ai lea fuafuaga.

Ona ou oo mai lea i le Minisita lea o le Soifua Maloloina. Ia atonu e le o po se lilo i le paia o le atunuu i le tele o le manaomia e le atunuu o fomai o lau matafaioi lea e fai i po uma lava ma te agai mai ma si ou toalua e matamata i le mamalu o le atunuu o lo o i ai i le falemai i taimi o po. O le mea e maitauina faafetai lava i le Afioga i le Minisita o lo o aumai nai tama ia e fai latou private faaoga i po ia. E vave le faasolo mai a fomai i le vaaiga, a o le mea lea e oti, o nurses teine ia e siakia le toto ma le suka. E oo mai le 22, ae toetiiti ai pe le mafai ona aveifo nisi staff e faalautele ai le auaunaga lea i nurses ia e siakia muamua le mai e le i alu i totonu o le falemai. Aua e le o mafai ona silafia e lena itu o le Maota i Minisita aua tou te le o lava outou i le falemai tou te o lava outou i private. A o matou nei o le Itu Agai o lo o agai i le falemai, oka, talofa e i le mamalu o le atunuu o lo o i ai. Pe mate o atu lava ua oo i le 102, e nofo ai lava i le po se i faagasolo le tulaga lea.

O lea e tatalo atu foi le Minisita mo le Soifua Maloloina, se i tautuana le tatou paka foi lea, e le o ofi le mamalu o le atunuu e tuina atu i totonu. O le mea lea saí

FOFOGA FETALAI: Ia se i tulai mai le Minisita mo le Soifua Maloloina.

Afioga Hon Tuitama Talalelei Tuitama: Lau Afioga o le mea e fia faasao leaga e moni lava e mama ae leaga o lea e faafofoga le atunuu, o lea sa e saunoa i faamatalaga faauigalua. Saunoa le sui usufono o matou lea e le o i falemai na o latou lea e o i le falemai. O le vaiaso lea na tea nei i le Aso Faraile, sa sau ai le fomai faapitoa mai fafo sa fai ai lau appointment ona ou alu lea vaai ai lou mai.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

Ae ou te le i vaai lava i nisi o o atu i ai e vaai, a o fomai faapitoa nei e le tele ni taimi e omai ai e le o faaaogaina atoa foi o latou taimi i latou o manaomia le tulaga lea. O le mea lea e faamalulu atu i le sui usufono, o lea foi e agai le Kapeneta i le falemai e vaai ai, e oo foi i le Palemia sa taoto foi i le falemai e le i leva atu.

Ma le faaaloalo.

FOFOGA FETALAI: Saunoa mai le sui usufono.

Afioga SULAMANAIA FETAIAI TAUILIILI TUIVASA: Lau Afioga i le Fofoga Fetalai ou te le faatautee i le Minisita, ia o lena na e afio lava oe ona o lau appointment. A alu atu loa le appointment, e tataua lava ona alu e fai le appointment. A o le tulaga lea e i ai matou, o lea e sulufai atu ua mafatia. O le tulaga i le aso ananafi sa ou asia ai le falemai i sau vaaiga se i tulou, ona ua sau foi le matua ia ua le maua le ninii o faamaumauga ia e aumai. Ia sa ou asia ai le tulaga i fomai mata. Ia e faanoanoa lava le agaga ona e tasi lava le teine lea e faapitoa i le vaega fomai mata, ona ave lea o au e teine i totonu i le vaega lea e taumafaia matatioata e fuafua i ai lau vaai. Ae uma ona fua lau vaai ananafi ae fai mai le teine, -alu loa i le pharmacy e faatau ai sau matatioata. Ou fai atu, -oi e leai ni tatou mata iinei alii? Ia se i silasila ane lau Afioga i le Minisita i le tulaga lea i fomai mata, sa ou vaai i ai ananafi ma ou aluane faatalatalanoa sia vaega, ia o lo oi

Afioga Hon Tuitama Talalelei Tuitama: Lau Afioga i le Fofoga Fetalai, e manaia lava le fai ma faasao e lelei e sosoo ai le fau ma le fau. O le tulaga, e eseese matafaioi, o le isi fomai o le ophthalmologists, na te vaaia mea o gasegase tau mata. O le fomai lea e vaaia mea tau tioata, o le oplometrists. O lana ia lava la galuega, na o le fua lava o le malosi ma le mata e talafeagai, ona fai lea o le oka avatu ia te oe ona e alu lea e faatau mai lau mata. A oka foi la i luga e auala mai le falemai, e totogi lava e oe lau mata e le faataua e le Malo le tulaga lena. Ua leva a la ona fai mai le tulaga lea, e le o se mea fou. Ma le faaaloalo, e faamalalalama atu faapena.

Afioga SULAMANAIA FETAIAI TAUILIILI TUIVASA: Faafetai i lau Afioga i le Fofoga Fetalai. Masalo o la e faafofoga mai, sa uma loa ona fua ou mata ae faasino mai ou te alu ia Janet, le kamupani lea e aumai le tioata. Ou fai atu, oi e leai ni tatou tioata i i? Ia pei o lea e saunoa mai le Minisita o se uo foi ia te au, a o le lelei o le fautuaga, ae uma ona fua lau vaai ae fai mai e agai ia Janet o ia lea e sapalaia mai mea o tioata ona ou toe foi atu loa lea i gauta e faatino ai le frame e tuu ai le tioata lea e aumai i le pisinisi. Se i silasila ane i lea vaega pe le mafai ona oka uma ane i le taimi lea e aumai ai tatou vailaau ma mea uma ma oka atu ai ma ni frame po o ni tioata lea e faatino ai tatou vaaiga.

23 IANUARI 2018

**Tulafono Tau Faaofi o le Faatatauina o Tupe Faaopopo (Nu.1)
2017/2018 – felafolafoaiga i luga o le faitauga faalua**

Ia o leni taeo lau Afioga i le Fofoga Fetalai ma le mamalu o le Maota, pei o le manatu lena o leni itumalo, afai foi e paopapa se faamatalaga, ia o le sui lava lena o Vaimauga ia, e avatu mea lelei, o le lelei o fautuaga e lelei ai le tou sa. Ae ona o lea e le o afio mai le Afioga i le Palemia, o le Afioga i le Palemia e tatau ona faataitai i ai tagata foi lea i le Afioga i le Palemia ma lana Minisita Lagolago. A o le Minisita e to i ai lou pulou, o le Minisita o Vaalele ma lana Minisita Lagolago. O taimi uma lava ta te vaai i ai e o toalua lava le Minisita o Vaalele ma lana Minisita Lagolago. Ae pau lava le taimi sa ou vaai ai i le Afioga i le Palemia ma lana Minisita Lagolago na o ai o le taimi lea na fai ai le faamasinoga o le Minisita Lagolago ae o a ii le vaalele foi lea po o Vanuatu ea lea na o ai lea na faasea ai foi le atunuu i le sola i o ae o lea e fai leí

Ia o leni taeo ma le faafofoga a le atunuu, ia malu ave i fale i lau Afioga i le Fofoga Fetalai se manatu. Ia manuia le Fono lau Afioga i le Fofoga Fetalai.

FOFOGA FETALAI: Ia, ona o lea ua maea le saunoaga a le sui usufono mo Vaimauga Sasaefí Ia, se i saunoa pea le sui usufono.

Afioga Peseta Vaifou Tevagaena (Faasaleleaga Nu.4): Lau Afioga i le Fofoga Fetalai, ua alu leni taeo ua tau valea lou mafaufau. Na ou faalogologo ma le totoa i mau saunoaga, lea foi ua sau le saunoaga a le sui usufono mamalu pei e faasaga mai i le Palemia ma au. O le mea fia faasao lau Afioga i le sui usufono mamalu, afai e seasea e vaai mai ia te au ma le Palemia, o le maua Matagaluega e faapena. A oo ina malaga le Palemia i le tele foi o ona tiute, ona ou faamuli lea o au i le ma Ofisa, ae le faapea a malaga le Palemia ma ou mulimuli atu ai lea ma au ia. O le mea fia faasao. A fai foi ae oo mai oe i le mea lea, o lau fautuaga ia te oe, aua e te mulimuli i le mea e alu i ai le Minisita, nofo pea oe i i e vaai le Matagaluega maí E faapena, aua e leai ni mea e maua ai. O le mea la lea e fia faasao atu i lau Afioga i le sui usufono mamalum e leai e le o se isi tulaga.

Ia o si vaega lea lau Afioga i le Fofoga Fetalai e fia faasao atu ai le saunoaga a le sui usufono mamalu.

FOFOGA FETALAI: Malo faafetai. Ia o lea ua maea le saunoaga a le sui usufono, ma ou teí o lea ua tulai mai le sui usufono mo Aana Alofi Nu.2, ma ou te tapa ma le faaaloalo lau Afioga i le sui usufono mamalu e te tulai mai aua le saunoaga.

Tofa ILI SETEFANO TAATEO TAFILI (Aana Alofi Nu.2): Faafetai lava i lau Afioga i le Fofoga Fetalai. Ua tulaga ese foi leni taeo i le Fonousu ma le Fonotoa a Samoa, aua o leni faatoa tau amatamata foi leni tausaga 2018. Ona matou manatu lea, ia e le laaloa foi se matou faamatalaga.

Ou te faafeiloai atu i le paia ma le mamalu o le Fonousu ma le Fonotoa a Samoa, i le afio o lau Afioga i le Palemia, afio foi le Sui Palemia, Minisita o le Kapeneta faapea foi Minisita Lagolago.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

E ofo alofa atu ia te outou pei ona ofo alofa le agelu ia Maria, si ou alofa oe le ua alofaina e le Atua ae ou te le sogi atu ia te outou e pei o le sogi a Iuta le faalata. E faatalofa atu i lenei taeao fou i le ee papaaao o lau Afioga i le Taitai o le Malo, Sui Taitai, Minisita o le Kapeneta ma Minisita Lagolago. E faatalofa atu foi i lenei itu o le malu i le afifio o sui usufono o le itu o lo o faapea ona faatauagaia le Malo. Aua e ui lava ina tatou va i falevea pei o lea muagagana ae seasea tatou feiloai. E faapuna lava le Iutaia ia i lona faleie ma suesue nai mea aua o tatou itumalo.

E faatalofa atu foi i lau Afioga i le Failautusi o le Fono Aoaofa Faitulafono faapea foi le malosi o le Fono Aoaofa o lo o faapea ona vae ma lima aua le paia ma le mamalu o le Fonousu. E faatalofa atu foi i le afifio o Faauluuluga o Matagaluega eseese i lenei taeao. E le faagaloina foi le tapuaiga a Samoa o lo o faafogafoga mai tapuai, o lo o faanonomanu aua Samoa ma sona lumanai, malo le tapuai.

Ae ou te manatu i lenei itula ua tulai le sui usufono mo Aana Alofi Nu.2 se i faailo foi se lagona ma avatu ni motugaafa aua le Tala Faatatau o le Tupe 2017/2018. Sa vaavaai lava ma nofonofo foi, sa taumanatunatu pe fai se lagona pe leai ae peitai ane o lea ua tilotilo atu i le Tala Faaopoopo o le Tupe pei ona i ai, ona tomanatu lava lea e le faateia lou sui usufono aua o le upu moni lava ia, o mea lava faapenei e le atoa a ia i se faiva o se tautai, e manaomia lava le seleni mai lea taimi i lea taimi, e i ai foi galuega faaopoopo i Matagaluega taitasi. E pei la ona i ai le Tala Faatatau o le Tupe ua faapena ona taoto i le Laulau a Fono i lenei taeao, ma e lagolagoina e le sui usufono mo Aana Alofi Nu.2 le Tala Faatatau Faaopoopo 2017/2018.

Ae ou te manatu na o ni nai lagona laiti e fia faaali i nisi o mataupu e ese mai le Tala o le Tupe. E to lou pulou ma momoli le faafetai i lau Afioga i le Minisita o Vaalele Sivili a Samoa. Ou te manatu o se laasaga maoae lea ma le lelei mo Samoa ma ona tagata, aua o le upu moni lava ia, ua logo a le tagi ma le oi o tagata ona ua faapena ona le maua se mapusaga i le taugata o femalagaaiga a nai o tatou tagata e malaga atu malaga ma ii le tele o faalavelave fai, ae ua leai se faamamaavega. Peitai ane i le tulai mai o le tatou Kamupani Vaa e pei ona toe lalaga nei, ua faamalo, o se tofa ua faapena ona tagatagai mamao i ai le Malo aua le atinae o Samoa ma ona tagata. Ia sagai ane ai o le tai, au o manu leni faamoemoe. E pau lava le tuualalo foi i le tatou Palemene nei, ia tausolomua ia i tatou ona faaoga le vaalele a le Malo tatou te femalagaai ai, ae le o le tuu o le tatou vaalele ae tatou o e lagolago isi vaalele. O le tuualalo foi lena o lo o fai i aiga ma uo o lo o faapena ona talanoa i ai. O lea ua lalaga ma faatu le faamamaavega aua o tatou tagata femalagaai. O le upu moni lava ia, e le faapea, e soo se pisinisi lava e le faapea e faatu selau pasene sona auaunaga. E i ai lava le toatuga ma faafitauli a o nei vaega uma e mafai lava ona fofa alamea a o faapea ona tapenapena mai lea taimi i lea taimi. E faailo atu ai le agaga o le faafetai ma le faamalo i lau Afioga i le Minisita e fitoionu i ai lea vaega.

23 IANUARI 2018

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua**

Sa alu le asiasiga a le matou Komiti i tua, Social Development i tua i maota gasegase i tua. Lau Afioga i le Minisita o Falemai, o lou uso lava i Aana, e maitauina lava le tulaga faaletonu o le tatou falemai faaitumalo i Leulumoega. I le tulaga lava ia i lona tu mai ma ona tulaga uma, ua le tu mai i se tulaga lelei. E maitauina foi nisi o falemai na fausia faatasi ma le falemai i Leulumoega, ua maea ona toe faafou. Ae paga lea, o lo o tumau pea le faaletonu o le apitaga e taunuu i ai le atunuu i le falemai lea i Leulumoega. Mo le silafia, o le falemai lea i Leulumoega e agai uma mai lava i ai Falelatai, Lefaga e oo foi i le agai mai i le Tuamasaga, e oo mai i Afega ma Leauvaa o Leulumoega e agai i ai. O lea e tatalo atu ai ma le agaga faaaloalo i lau Afioga sei tagai ifo i lea vaega. E le gata i lea sa faapea ona faato mai le tamaitai fomai sa matou feiloai, e leai se taavale e feaveai ai mai i le falemai lea. E tuu atu i tafatafa o lau Afioga ma le Pulega atonu o le a aoga le toe tuufaatasia o le Matagaluega, o le a vave ai ona maua se fesoasoani mo le ta falemai i Leulumoega.

FOFOGA FETALAI: Ou te faauilavea i le saunoaga a le sui usufono mamalu, ona talu ai o lea ua oo i le taimi e manava ai ma faamuta ai le tatou galuega. E i ai le manatu o le a faamaea lau saunoaga i le aso a taeao ma toe tapena atili nisi mataupu e faaleleia ai le tatou falemai. E tonu ma sao a au.

Tofa ILI SETEFANO TAATEO TAFILI: E le sopoloa le pule ao i le pule po. Afai o le tofa lea i lau Afioga i le Fofoga Fetalai, ia, e alu i le ia a le tautai o le faalolo.

FOFOGA FETALAI: Malo faafetai. Ae tatou te le i tolopo mo le aso Fono a taeao, ou te tapa lau Afioga i le Sui Fofoga Fetalai, faamolemole faaiu mai la tatou galuega i lenei aso i se tatalo puupuu.

Na tolopo Taulumaga a le Fono Aoao i le itula e 12:56 i le aoauli, seia aulia le itula e 9:00 i le taeao o le Aso Lulu, 24 Ianuari 2018.